

十一日度橋西北行十里北入峽爲山川口又十三里抵白竹江望西北鈎挂山甚兀突聞其上金寶頂甚奇遂自白竹橋溯江西北五里進峽口兩山壁立夾溪沿溪東北崖上行緣崖高下屈曲十里出峽爲南洞聞南洞北五里洞盡可由四川嶺達寶頂但路已沒遂捨北道西渡溪上嶺嶺左腋有瀑布又十里至打狗凹宿興隆菴菴北高嶺卽金寶頂也十二日由菴西上沿崖北轉三下上又三度坳曲共三里踰土地坳西望新寧江已在山麓下山五里爲大竹坪坪北踰嶺共三里至大鼻山

十三日從大鼻邨後來澗上一里飛瀑懸崖宛轉下修竹邨

遊記

三册上
粵西一

二

巖掩映卽西攀嶺上約行一里至南來大道乃從南大源上此者又四里至角菴基伏身蛇行菴後叢竹中四里乃從右崖叢中上又二里行觀音竹叢中竹大如管多竹實如蓮肉大採筍置路隅識來徑竹中上二里至寶頂殿基日甫中四山俱出南峰近爲鈎挂山石崖峭立東北向若削再南卽打狗嶺再南爲大帽再南爲南寶頂頂最高與北相頡頏而基後絕頂更倍之復從竹叢中東北上二里至頂其觀音竹更大笋腴美然叢密中無由四望登樹踐枝終不暢眺忽竹浪中出大石如臺梯躋其上羣山歷歷可縷數仍下山宿大鼻

邨

十四日隨溪西下四里爲大源則大鼻西峽水與邨後東峽水會橋於上曰潮橋橋西爲大源邨予往南頂則從橋東隨澗南行里許渡木橋澗忽東折入山路南出山隘澗復墜路東破峽出連搗三潭上方瀑長如布中凹瀑轉如傾下圓整瀑勻成簾下二潭俱有圓石中立承水水墜潭作勢潑迴尤異又三里度橋爲桐初有水南自打狗嶺來會亦橋其上二水合而西南則又觀音橋跨之大道從觀音橋西踰嶺出予從橋下隨溪南一里水從西峽出路踰一嶺下墜深壑中四里至陳墓源瀑自東南山峽中踴躍出與東嶺溪合亦橋跨其會處大道與水俱南予度橋東躋嶺卽湧瀑南嶺也二里

遊記

三册上
粵西一

三

平行嶺脊北望北寶頂巋然峽中水近自打狗南崖直逼其下南望新寧江流遠從巾子嶺橫界南寶頂之西其西南有峰尖突正當陳墓水口已而路漸出其下二里南下嶺行凹中二里又踰小嶺里許至蘇家大坪坪側大瀑破山西向出勢甚雄偉下爲大溪西北合陳墓源出口下午東南上一嶺悞東往大帽嶺道乃西南轉六里出南寶頂道桃子坪問上梁宿處四里而是踰嶺東至新開田所有路南下伏草中復悞出其東歷險陂三里不辨所向已忽得一龕地名挂幡去上梁五里矣其處五里至快樂菴又十里乃至南頂以暮雨

遂歇龕

十五日雨不止滯龕中 下缺一日

十七日從定心橋下過脊處覓蓮瓣隙痕削崖密附旁無餘徑乃從脊東隔峽望之痕雖呀然然上垂下削非托廬架道處也乃上定心石過聖水涯再由捨身崖登飛錫絕頂返白雲菴

十八日由東路下山一里餘路旁峭石分列石級出其間爲天門門外聳石立路右上大書白雲洞天從此歷磴下危峭較勝西路四里經顯龍菴菴北向又東下南望隔山飛瀑自那拏山南腋下先從寶頂卽窺見至此始睹崇隆若九天也又東下五里北渡一小溪深竹中有寺寂然則苦煉菴矣菴

遊記

三册上
粵西一

四

南向左右各一溪自後來繞而右溪較大橋橫其上水從西南山腋透壁下菴前東南度橋南上嶺其地竹甚大路始分東西岐從西下始見那义瀑北掛層崖苦煉溪亦透空懸壑與那义大小高下勢相頡頏然苦煉近在對山路沿之同下朗朗見其搗壑勢其下山環成城瀑垂其中出西壁與那义東大溪合而東南去又見西峽中一瀑透山下連瀉九層雖練細然甚危長路乃東轉下共三里又一溪自西北來渡而隨之始僅涓微漸下漸大遂成轟雷湧雪觀路循溪北東二里爲大坪右渡溪入一邨家邨西上流爲蓮花菴竹色叢鬱遂西南渡那义大溪溪東北出白沙江又西上嶺十三里抵

望江踰嶺溯溪又十里爲桐原山下山五里隨小車江南下
又四里桐原大溪自西來與江合而南去度小車江口橋從
水東上山隨江東南路行夾江山上極險峻一小石山北面
平剖江遶其南路遶其北東北又有小溪破峽成瀑凡東南
四里始下至江涯稍上有溪自東北來入其北峰曰不住嶺
十九日東南上嶺隨江東四里下涉跳石江又上山三里出
兩山峽口壩堰水甚巨曰上官壩壩外一望平疇直南抵裏
山隈出峽水東南入湘路隨峽右西南下一里抵白塘邨邨
後石山特立曰金鍾山下俱青石峭削西南渡溪橋過棄鷄
嶺其八里出咸水則官道山棗驛也渡橋西南行長松合抱
夾道蔽天極似道州永明道十里石脂鋪從小路東南折五
里抵界首爲全州興安界

遊記

三冊上
粵西一

五

二十日溯湘江西五里出塔兒鋪古松時斷續不及全州連
雲接嶂也三十里至興安縣萬里橋橋下水遶北城西去兩
岸甃石中流平而不廣卽靈渠已爲漓江矣湘漓分水處尙
在東三里也由橋北溯靈渠北岸東行已復北折渡大溪則
湘江本流也上流堰不通舟旣渡又東有小溪疏流若帶舟
道從之蓋堰湘分水西注爲漓又東濬湘支以達舟楫稍下
復與江身合矣支流上跨以接龍橋橋南水灣爲觀音閣去
城東二里又東南五里則湘水南來直逼石崖下崖竄立南

向曰獅子寨循寨足溯溪東入東北七里踰羊牯嶺抵狀元峰下有廻龍菴。

二十一日菴東踰小山南一里至長冲東逼狀元峰麓又里許至草菴則狀元峰南一峰片插曰小金峰峭削似過之二峰各有路皆草翳余直東上二里抵狀元翠微間山削草合蛇路伏沉莽中漸東北轉三里直上踰嶺均麻川遶其下麻川東大山橫亘屬灌陽界乃老龍脊也均北峰下卽入九龍殿之峽予從均南直躋峰頂峰甚峭窄凡七起伏共南一里上狀元峰則亭亭獨立矣但北面九峰相連南走與小金尙隔二峰峭若中斷不能飛度故道必由麓更上小金頂也頂

遊記

三冊上
粵西一

六

北第三峰西北石臺如船首飛凌空坐峰頂久之下返廻龍菴。

二十二日東行二里過九宮橋踰小嶺共二里至錦霄是爲峽口麻川江自南來北出界首截江以渡江深沒股麻川至此破山出名七里峽下又破山出名五里峽錦霄在其中爲陸行口過江湖東夾之溪入三里登山脊至九龍廟南北東皆崇山逼夾南麓卽所溯溪之北麓溪聲甚厲遂下山過觀音閣支流分環閣四面惟南面石堰僅通水東西北則舟上下俱繞之惜閣小不稱閣東度石橋循分支西岸溯流一里至分水塘塘以巨石橫絕中流南北連亘以斷江身祇以小

穴洩餘波。由塘南分湘八瀉塘之北。卽濟湘爲支。以通湘舟。於觀音閣前者也。遂刺舟南渡。分瀉口入分水廟。西二里抵興安南門。出城西三里。抵三里橋。橋跨靈渠。渠至此細流成涓。石底嶙峋。時巨舫鱗次。以箔阻水。俟水稍厚。則去箔放舟。

焉。

二十三日。橋西有金鼎山。山爲老龍脊。由此至興安。南轉海陽。雖爲史祿鑿山。分瀉水。而橋下有石底水。不滿尺。終不能損其大脊也。上一里至頂。頂大止丈許。惟南面羣巒紛叢。嵐霧中若聚米。若流火。俯瞰其出沒甚近。下至三里橋。西隨靈渠西南去。已而渠漸直南。路益西路。右石山叢立。雨中迴眺。

遊記

三冊上
粵西一

七

共十里。已透金鼎。所望亂山堆疊中。穿根盤壑。多迴曲。無升降。又三里爲蘇一坪。東有岐。可達乳洞。予先西趨嚴關。其二里而出隘口。東西兩石山駢峙。路出其下。若門中闕。傍裂穴如圭。梯崖入其中。不甚敞。空合如蓮瓣。坐觀行旅紛紛沓沓。返由蘇一坪。東南行一里。溯靈渠。東北上。一溪東自乳洞夾注。爲清水。乃東渡靈渠。四里過大巖堰。渡堰東。石橋轉入山南。小石山分歧立路口。洞呀然南向。遂西向。隨溪入。二里至董田巨邨。洞卽在其北。一里日暮。不及登。乃趨東山。入隱山寺。寺後有洞門。南向高懸。水由下出。西合乳洞。北流水破。西北山腹。出大巖堰。縛炬從寺右入洞。攀石崖上。石巉削。圯側。

下墜淵壁若裂深窅暗中水石無可着足乃出

二十四日西二里至乳巖下洞中洞上洞雨中返寺

二十五日東一里出山口支峰兀立處有菴草翳無人從菴左先循其上崖崖危草沒予攀隙入轉崖之東則兩壁門裂內裁一線剖宛轉嵌漏上來參天離合殆十層起下來直墜澗底俱凭臨千尺夾半兩崖復有痕受足肩倚隔崖手攀石竅無墜隕懼直進五六丈夾始東轉出由支峰均脊北望觀音巖在對崖亦幽峭可喜昨從其前盤山轉惜未一至今不能更北也下山東南十七里至開洲爲湘西岸南十三里宿唐滙田東有大山巋然出東界上者曰赤耳山

遊記

三冊上
粵西一

八

二十六日南湖湘六里爲太平堡東西山至是開成巨塢小石峰一帶駢立湘水東南南十里飯廟角雙泉寺南卽靈川界南二里東南岐入山又二里度橋湘水有橋始此循左山南四里一石峰特立水中曰海陽山有海龍菴在峰南石崖半菴爲臨桂屬抵菴曰巳西乃下山自東麓二洞門繞北西入一洞龍母廟已圯卽從流水中行轉南水遂成滙深沒股菴下石崖壁立下臨深塘由塘南水中行東轉登山海陽山俱崆峒貯水水門二南平西出甚急東旱門二下一二尺卽水滙其中深者五六尺山南水塘有細流東源季陵亦下此則此山尙在過脊北水俱北流惟爲澗源也澗源尙在海陽西

西嶺角

二十七日東望白面山南諸峭峯甚奇聞其上有讀書巖遂
東北四里度雙溪橋又東一里尖峯在白面西望之趨乃登
嶺北切望山下水反自北南去北皆山岡亘絕無容流處由
棘中循崖南轉捫隙歷塊上峰腰一洞南向內西裂龕窟吐
納日月以爲卽讀書巖矣但平入三四丈漸隘其下路復翳
塞頗疑之出洞望洞東削崖萬丈插霄臨淵上一石飛突無
所承極似巨鼠下躍然無路可捫乃裂棘攀條梯登懸石直
至巨鼠崖下仰望巨鼠又有二小鼠下垂崖腰一線痕可着
足下仍峭壁又東有巨擘一雙作接引狀手背拇指分合都

遊記 三冊上
粵西一

九

辨至其處山腰痕絕不可前乃從舊路下至南麓詢耕者巖
尙在嶺切西當從嶺西下不當東上也乃從麓西溯澗而北
則前所望溪從洞中出讀書巖在澗上登之洞西向高而不
廣內垂柱擎蓋種種異觀三丈後卽北轉下隘不可俯視出
過下水洞水卽從讀書巖下石穴湧出水與口平第見急湍
湧流不見洞門也由海龍菴東南過季陵循過脊西行二里
爲海陽堡堡前又分一支南下山與西山夾爲兩界水始淙
淙南出隨水下一里則西谷中裂水破峽出又羅姑山與西
嶺夾而成流者皆爲滴水源矣越之西南七里循大澗嶺上
行忽有水自東南下搗成澗路隨之直墜澗底南越橋水自

橋下復搗峽中路不能從乃踰嶺隤然直下其四里出山口
又西南二里抵澗上西有銀燭山尖削特聳東南則石崖正
扼水口也

二十八日西南十里望西北五峰高竄頂平若臺可奪五臺
之名西五里直抵五峰南則亂峰尖疊付伯爲伍橫變側移
殆難更僕數其陽卽爲榕邨東南三十里有靈襟洞南二里
有陽流巖云西五里過上橋橋下水東北自叢尖山南西至
此又西南穿石山腋共三里過廖邨西北有山危峙爲金山
東叢角亭亭更覺層疊者龍潭山也又五里西穿石山峽則
諸峰分峙疊出離立獻奇石峰下俱水滙不流深者尺許淺

遊記

三册上
粵西一

十

半之諸峰倒插於中直如青蓮出水各欲獨上初兩大峰夾
道後又夾以兩銳峰道俱疊水中取徑峰隙令人賞無專接
但石皆廉利侔刃戟不免目慰足妬耳峰有名者曰雷笏曰
萬歲其間逸名者甚多共二里始出水磴平疇十五里直抵
兩山峽中山南北成門北山東垂石峰分歧起如削岐峰尤
亭亭作搔首態崖半裂透明隙惟南眺光列一線少轉步卽
失之南山又有石突綴其首人行於下者左右流盼又西爲
浮橋滴水北自皇澤灣至是極汪洋桂林省城東臨其上城
之臨水者東北爲東鎮門又南過木龍洞爲就日門又南出
伏波山下爲桂水門又南爲行春門極南爲浮橋門皆東面

臨江自北隅南至浮橋共五門浮橋貫江而渡覓顧僕不得宿城中逆旅。

二十九日東出就日門從城下北行城上一山當面起石脚下插江中路忽穿山透跨下南北呀然殆天闢關津也西則因山爲城城以內卽疊綵東隅穿洞出正下臨江潭盤山壁透腋入又爲木龍洞洞亦自南穿北東開窓隙屢引天光外瀕江有路行者或內自洞行或外由江岸俱可北達出洞片石夾峙上屈曲架穹石色錯青紅似非本山石質不知何處移架此洞北闢成崖綴以飛廊前臨大江後倚懸壁憩眺勝莫踰此循城溯江北一里過東鎮門又北過城東北隅爲東

遊記

三册上
西粵一

十一

江驛驛東向當皇澤灣南下衝出驛北望皇澤灣二紅舫泊山下疑顧僕或在此舟趨問之則泊舟之山在松陰中乃虞山也其下大殿爲舜祠祠後卽韶音洞東臨江曰薰風亭余沿江登山上薰風亭由亭西下謁舜殿從殿後入韶音洞洞西向高二丈東透出約十丈洞東高崖巖絕小水匯其前幽潭嵌壁水自北塢南來石梁當洞架其上曰接龍橋坐橋上還眺洞門崖壁更盡崢嶸勢從此上躋宛轉石級間將至山頂一靜室窓櫺西向戶榻洒然室斗大而潔乃與靜聞解衣憑几指點西山甚適因急欲覓顧僕下山南循故道入就日門門內南半里山伏波山下出桂水門南一里經行春至浮

橋門始遇之。

五月初一日北抵靖江王府循王城北行登疊綵山山踞省城東北隅山門當兩峰間亂石層疊錯立浪文花萼騰簇眩目上爲佛殿殿後一洞屈曲穿山背門南向高二丈深倍之北透小門忽轉而東闢洞前下瞰城東江水直漱其足洞內石門轉透處風從前洞扇入寒吹凌人土人稱爲風洞石門北向當東轉之上仰見石板平度上透圓竇若樓閣再駕予與靜聞分道趨各會層樓之上其處東復開隙垂乳列於西乃從圓竇中墜空下出後洞北躋磴上南越洞頂遂登絕巘則越王壇也是爲桂山上皆石萼轟發一石峰前支起謂之

遊記

三冊上
粵西一

十二

四望山西一石峰高與此峰並峰中有洞高懸望之呀然中空亟下仍從風洞出寺由寺西坳中復登西峰峰半洞東向透峰腹而西徑十餘丈高十之四由其中望東西洞然惜絕頂地少窄未能徹矚全勝耳是名干越山洞西墜壑下極險峻仍東下至寺有大道北透兩峰間抵麓西行里許又一洞倚山北向遂拾級以登其下先有一洞高可丈五寬廣盤曲多垂柱界竅分歧土人以爲馬廐散卧馬匹令人氣阻由西南躋級更上從洞門入透隙而西外裂重門內駕層洞既下西行見峰頂洞門西墜處危峽孤懸下有長垣環之仰眺不得端委則藩府別圃也遂北轉至北門門在兩山聳夾中門

外兩旁山俱峭拔卽爲華景寶積衆勝云折而東南出桂水門抵慶真觀北渡江入玩珠巖卽伏波山東麓石壁下嵌重江裂隙兩層上縱下橫上者高盤入頂無級可階橫者下卧波上下石浮敞爲臺覆以欹石石柱下垂覆簷外直抵下石不接者僅寸名伏波試劒石後壁紅白紋若縷圓宕三暈恰當其首故曰玩珠雙紋後內復裂隙直抵豎峽下垂柱之西石臺中坵橫石以渡更北穿菊竇下臨淵碧無底南入山腹有光西轉北達前門是其與境矣但石色波光俱不若外巖玲瓏映徹也登涯由浮橋返寓按圖志以索桂林諸可游者初二日東出浮橋門渡浮橋又東渡花橋循山北轉山峙花

遊記

三冊上
粵西一

十三

橋東北七星巖卽倚焉巖西向下有壽佛寺寺左登山一亭翼然迎客曰摘星石崖橫騫其上僅可置足然俯覽城堞諸山甚暢亭左佛龕當巖之口入其內不知其爲巖也推龕後扉入歷級上約三丈忽轉而西北豁然中開上穹下平多列筍懸柱爽朗通漏此上洞也是爲七星巖從其右歷級下又入下洞是爲栖霞洞洞雄拓門亦西北向仰眺崇赫洞頂橫裂一隙石鯉自隙中懸躍下向首尾鱗鬣酷肖菊盤結幡蓋五色燦爛西北層臺高疊懸梯而上曰老君臺由臺北向洞若兩界西行高臺之上東循深壑之中由臺上入一門直北至幽暗處垂石上穹無際下陷成潭瀕洞峭裂忽變夷爲險

返下臺，仍至洞底，尊者携松明前驅，循臺東壑中行，始見臺壁攢雲錯綺，備諸幻化，直北入一天門，石檻垂立，僅度单人。既入穹然高遠，左橫列石欄，下深黑杳不見底，云獺子潭，卽老君臺北下墜處。至此高深易位，又成一境內，又進兩天門，路漸東北轉，崖石詭變，多所彷彿，尊者行急，子強留諦視，顧此失彼，然子所欲睹者，正不在種種規擬也。又踰崖上，東有潭，淵黑如獺子，宏廣更過之，是名龍江，下與獺子潭通。又北行東轉，過紅白檀，鳳凰戲水，穿一門出，忽見白光一圓，內映沉壁，遂東出後洞，水自洞北環流南入洞中，想下爲龍江者，小石梁跨其上，宋相曾布帥桂時所爲，是名曾公巖，蓋與棲

遊記

三册上
粵西一

十四

霞一洞，潛達兩門，各擅耳。子佇立橋上，見澗中有浣汲者，子訊水從西北來，可溯入否，其人謂水穴之上，更西北可深入數里，名勝較倍棲霞，水穴則深淺莫揆，惟寒辰肅月爲可涉。子卽倩其人爲導，其人歸取松明，子隨之出洞，右得慶林觀，期觀中炊以待，遂同尊者入，仍過紅白檀，始由岐北向，則佳偉殊麗，繁錫嘉稱，最深入，遇潭淵杳，當橋澗上流，尊者阻進，謂前炬數日，鮮竟游履，抵此從無入者，况當夏漲，襄陵可嘗不測乎，乃返計自棲霞達曾公巖，徑約二里，復自巖口出入，盤旋三里，洞之觀止矣。飯慶林觀，望來時所見搔首峰，卽立其東，從間道出其下，則峯下西開一竅，圍者廬之，北復有巖

洞種種遍曾公巖上下左右殆難數計也循七星南麓北向
草莽中連入三洞計省春當在北可踰嶺遠遂北循嶺切微
徑里半至山頂石骨凌嶒不容着足石隙少開處棘刺沉翳
愈窮攀躋然石片布奇峰辨分異遠望掩映愈披愈出令人
心目勞遷又里半踰頂下復得鑿石之級級盡卽省春巖巖
三洞排列俱東北向最西者騫雲上飛有倒石下垂如枯槎
老龍西入南轉洞漸黑惜無居人不能索炬入洞右旁通一
竅以達中洞甚深難遠入洞前垂石亦作槎勢又透一門以
達東洞東洞垂石愈繁洞亦旁裂中有清泉下注寒碧成潭
由洞前循崖東行洞土聳石如人立獸蹲東則危崖亘空仰

遊記

三冊上
粵西一

十五

望如劈其下拖劍水縈之卽癸水也源發堯山抵山北麓西
出葛老橋入瀉水時子轉至山東隅仰見崖半裂層竅者三
乃披莽隙梯懸累上既達一竅西通中竅中竅卑伏首不得
仰從外橫度有同臺榭不由中與竟達第三竅穿隙入後有
一龕窻闕其前中懸玉柱柱左又有一龕圓頂平座前正對
玉柱子同靜聞分踞柱前窻隙下臨危崖行道者仰望無不
徘徊忘返二榭樵仰睇久之亦躋登謂中竅之上尙有一洞
甚宏欲爲子攀躋上求子乃下倚松陰從二樵仰睇處反睇
二樵在上懸枝索級終阻懸漢莫能階升也仍西入省春出
西洞西又得二洞門北向再西者高五丈內稍下西轉雖漸

昏黑勢崇宏愈甚以無炬中阻左崖大書深刻五美章乃張
南軒筆惜無知者洞莫定其名或以爲會仙巖彈丸巖巖壁
宋蒲田陳黼題則渚巖洞也洞之西拖劍水自東北直逼崖
下崖愈穹削插霄凭淵良竭雄偉石梁跨水西渡已爲七星
山西北隅名彈丸山云由其西南度葛老橋東望崖巔有洞
高穹上下都極峭削南有一崖架廬亟東向登山山下一剎
與壽佛寺七星觀南北鼎列南爲七星觀東上卽七星洞中
爲壽佛寺東上卽棲霞洞北爲此剎東上卽朝雲巖也仰攀
磴數百級入巖巖亦西向在棲霞北洞口高懸內北轉穹危
愈峻嶽僧太虛駕閣洞口絕壁下瞰江城遠揖西山獨踞勝

遊記

三冊上
粵西一

十六

槩遂停宿因問上巖道太虛曰此巖高聳雖予近在崖右曾
無級可登約其洞之南壁與此洞北底隔止丈許洞內可鑿
空以通洞以外更無懸杙縹級處也憑欄北眺洞爲石掩反
不能近矚惟洒髮向西山歷數諸峰耳西山自北而南極北
爲虞山稍南爲東鎮門山再南爲桂山之木龍風洞最南爲
伏波山此城東一支也虞山之西極北爲華景山稍南爲馬
留山再南爲隱山最南爲侯山廣福王山此城西一支也伏
波隱山中爲獨秀其南對踞水口者爲漓山穿山皆漓江以
西故曰西山云

初三日追錄遊記於巖閣薄暮乃返

蓋南北皆與水會焉。又南轉西南山麓爲南華洞。洞南向。勢漸下。滙水當門。可厲入。深入則六洞同流。五洞之底皆交連中絡。惟北牖則另闢一水竇。初不由洞中通云。聞昔唐宋西江東滢榕樹門。隱山滙巨浸中。是名西湖。其時諸記勝者。俱云乘舟載酒入。今則西江南下。繁厥桑田。甚損浩蕩。觀子初至朝陽寺。月印上人導由殿後入東洞。穿老君側出山北。西過白雀嘉蓮。皆北隅洞也。南過西隅夕陽洞。又南盡東轉。過南華。則南隅之洞也。予欲從此涉水入。月印謂秋冬水涸。蟲螿窮幽。無所憚。今漲甚。深處莫測。蛇龍窟宅。其中老僧不敢導。請北遊北牖。乃東過西湖神廟。北轉過朝陽。踰隱山。東北

遊記

三冊上
粵西一

十八

隅。其處石片分列。如張幙。如裁雲。如透月。幻極紛紜。潤以采澤。不啻削芙蓉。綴蛺蝶也。又西入北牖菴。予與靜聞分踞北牖洞。西窻內外周覽久之。出飯菴前松蔭下。復抵南華。遇一田叟曰。此水竇。通雖深淺。疑迷。予獨熟過其內。君欲入。明晨當炬導。予強之。卽入。曰。松明未辨。乃以詰旦期。予遂南過武勝門。及寧遠門。度橋而南。西江走其下。東分兩支入漓。予東南循西江南分派。一里抵漓山。山之東卽漓江也。從山西麓轉其北。則漓水自北。江水自西。俱直搗山下。山怒崖騰。力扼其衝。由磴上盤山腰。得雉巖寺。寺後躋石峽。躡青蘿閣。旣

暝。下宿巖寺。

初五日客序遷除遂成午節令顧僕入郭市蔬酒出坐雉巖亭以蒲酒雄黃自酬節况復散酒青蘿閣時方禁龍舟舟人各以小艇私擢山下鼉鼓雷殷迴涉陷日既暮下山西入一洞洞在山足門西向高穹中平上鐫樂盛洞三字出洞東循雉巖崖麓沿江東憩其東隅一石上自山巔下插江底中刺穴透虛深二丈高三丈若闔門然江流自北匯其中涉其南透崖以上卽爲千手大士菴予濯足弄江抵暮上宿雉巖雉巖者統志以爲卽瀉山在城南三里陽水南支經其北瀉水南下經其東東有石門嵌江西有穹洞深入南有千手大士菴俱列其足雉巖寺高懸山半北迎兩江頽浪飛檻綴崖倒

遊記 三册上 粵西一

影澄碧寺西爲雉山亭南爲雉山洞洞外卽飛崖斗發裂隙逆峽直自巔下徹旁有懸龍矯變石色都異前大石平湧爲蓮臺臺右根與後峽相接處下透小穴入西向臺隙摩崖登臺則懸龍架峽正出其上昔有閣曰青蘿今移置臺端登之不知其爲臺也然勝概膺集不以閣掩是山正對城南爲城外第二重案山北一里曰象鼻山水月洞南三里曰崖頭淨瓶山荷葉洞俱東逼瀉江而是山在中較高志遂以此爲瀉山范成大又以象鼻爲瀉山二山形頗相似但雉巖石門不若水月擴然巨觀故遊者捨彼趨此然以予權之瀉江午向三山不特此二山相匹崖頭西北山脚石亦剝空嵌水跨成

小門其離立江水衝合中三山俱可名瀉也。

初六日南下山二里過南溪橋南溪之山高峙橋東南溪來自西南直逼西麓繞山東北入瀉去白龍洞在山椒洞門高張西向臨溪下廣列崇殿仰望不知爲洞由殿左透級上得旋室如層樓內有龕自然爲一洞絕勝處從此北向東轉遂成昏黑先是買炬山僧僧謂洞內可竟達劉仙巖不必更出及篝火入中寬敞多岐先極其東隅上躋一隙予以爲劉仙道也竟途窮莫進又南下一窪支竇旁午予又以爲劉仙道導僧謂此乃護珠巖道嶮巖莫逾躑躅杳冥中不若出洞平行為便乃下山至橋望白龍北復有洞盤空予渴赴劉巖遂從橋東循山南東轉南面一崖層突彌聳將捨之忽山雨至奔憩巖下躋隙坐飛石上雨簾外窺內映乳幙飄飄有餐霞想久之雨止下巖轉其東至劉仙巖巖與白龍東西分向有觀在巖下從觀右登級先穿一門西入卽踰其上復透門出得一巖東南向又左由透門之上再度而北亦開一巖巖前懸石甚壯當洞門爲屏若垂簾然予至巖卽周覽各竇詢與白龍潛通處竟不可得乃知白龍所通卽避雨巖下竇導僧所云護珠巖是也。

初七日由觀左登穿雲巖巖在上巖東南絕壁下亦東南向後與左右分穿三竇而左竇旁透洞前洞東爲文昌祠由其

前東過仙人足蹟蹟北更上卽爲仙蹟巖巖在穿雲東北上巖正東隅洞口亦東南向外甚危亮內乳柱倒垂界爲兩重若堂皇之後屏列窻櫺分內外室者洞後穿竇兩岐俱不甚深竒在玲瓏殫致返至觀南二里出十里鋪鋪在鬪雞西郡往平樂大道又東向岐路入一里北望穿山高懸隔江空濛雨色中再前望崖頭北隅梳粧臺下飛石嵌江剝成門闕遠望較水月似小與雉山石門形勢倫比然急流湧其中蕩漾尤異共一里東至崖頭廟崖頭在雉山南漓江西合陽江於雉山又東會拖劍水及漓江支水於穿山奔流南下此山當其衝山不甚高而屹立扼流有當熊勢北崖有臺曰梳粧下

遊記 三冊上
粵西一

卽飛石懸嵌中剝成門處崖竅波傾不能下瞰但見廻瀾素波觸石奮出砰然送聲至座坐久之返廟中由其後入一洞門西南向穿門歷級下其後呀然通望一石肺乘空色正綠是爲荷葉洞穿葉底透山東北卽通望口也漓江復濺其下由葉前南下東轉深昧中勢穹然不及索炬入山東北隅石崖插江山稱淨瓶以此須汎舟沿流觀之其上莫窺也仍出大道十里鋪經白龍洞北隨溪探前所望白龍左洞則元巖也巖東向洞門高聳下峽由南腋東入上洞東登必由北與俱崇深幽邃無炬不能遐歷洞前乳柱繽紛不減白龍上鐫元巖字甚古出洞入寧遠門返寓

初八日北出安定門東轉北入支徑登劉巖山有菴在山麓後爲劉巖洞洞西向東下淵黑由洞右躋危級上至明月洞洞高綴危崖半門亦西向東入呀然然昏昧莫辨出洞下崖半循崖少北復一洞西向門紛綸高懸僧伐木縱橫洞前無由上躋乃梯登以上一石當門樹屏由左透隙則宛轉玲瓏踰石脊東下穹然直透山腹闢門東出外臨層崖內皆乳柱充隙徑竇迸裂北一徑高穹下墜東轉昏黑亦有門東出閣不復下此洞東西透豁然有脊有門中界之不若穿山疊綠中隱南峰諸洞擴然平通下望明皎內無餘奧也下山西過北門門西峰當面起削山爲城循山北麓轉至城西北隅下

遊記

三册上
粵西一

三十三

下盤層石上削危城當卽志所稱始安嶠也而北門在兩山夾中東西峰各峭豎起因依爲門鎖鑰甚壯予少憩盤崖上旋入北門南一里至桂嶺碑側西向瀕城復得一山爲華景洞洞東向前對大池後所倚山則亦因爲西城者洞前巖平朗上覆外敞後穿穴爲門分爲三南入者窪暗而邃西透之穴昔穿城外因爲門今已甃石塞北轉者上出巖前遂西登城陴循南而升已從石萼叢錯中攀躋山頂頂卽寶積山志稱寶積與華景相連上多詭石怪木然今又名卧龍山想以武侯祠易名耳下山二里抵寓

初九日出文昌門乃東南門也正對南溪山南過石梁梁下

卽陽江北分派東轉一里抵石山南麓三教菴菴後爲古雲崖其山亦稱漓山粵人呼爲象鼻山山東南隅亦有洞南向循崖東北抵漓江盤山溯江從右崖危嵌中得一洞北向曰南極洞出其前直至西北隅爲象鼻巖水月洞貫其下飛崖自頂騰跨北插中流東西俱高剗成門陽江從城南西來流其中而合之漓上空明如月下復內外潏波而插江之崖下跨於水上屬於山中垂外掀正作捲鼻勢水洞之南崖半又闕陸洞其崖亦自山頂東跨江畔中剗竅若長廊直透水洞上北踞竅口下瞰水洞適有漁舟泊洞中崖石問令棹子遶出洞外復穿入洞內水陸勝觀一時兼盡乃南行一里渡漓

遊記 三册上
粵西一

二十三

江東岸又二里抵穿山下山西與鬪雞山對鬪雞在劉仙巖南崖頭山北漓江西岸瀕江之山也東西夾漓怒剗鼓距兩山當合名鬪雞特東山透明如圓鏡故更以穿山名之山之西又一峰危立初望竟爲一山上有豎石至其下始見豎石下剖直抵山根亭亭獨立山固以脆薄靈舉見奇土人名爲荷葉山殊得之穿山北麓嘉熙拖劍水直激崖脚循山之西南與漓合予始至其北隔不得渡望崖壁危懸洞門或明或暗紛紛錯列卽渡亦不得上乃隨溪南行隔水東眺則穿巖已轉不睹空明山側成峰尖若豎指矣又以小舟東渡出穿山南麓北面而登撥草尋磴一南向巖高倚半山疑卽穿巖

乃其中乳柱中懸有曲折致東入漸窪黑水滙於中知非穿巖乃出由其西上躋始得崇巖廓然平達山腹徑山十餘丈高濶俱五六丈真澈望澄明一空障蔽攀外崖東轉又開北向一洞列並穿巖而後不中通其東尙有三洞門下可望見至此則峭削絕徑而穿巖南口上復疊一洞後亦不透然內多重幃殆爲穿巖架閣也仍東下滙水巖巖東復有南向洞內亦支竅西入隘黑無奇遂出西渡荷葉山下北過訾家洲度浮橋而返

初十日抵王城後門登巖壇訂主僧獨秀期更於十三日

十一日出浮橋門過花橋問龍隱巖道爲橋東之南崖乃來

遊記

三册上
粵西一

二十四

時所過來道兩山北卽七星南卽龍隱至是始得其詳橋上南眺龍隱與月牙並列東崖第月牙稍北度橋循山其路易通龍隱稍南須從橋下涉江上其大道則自山北端拱石南踰嶺坳循隱真而西又從怡雲北轉始達予欲并眺端拱石人遂自橋東直走嶺下南上平瞻石人又南下得一大塘塘北循山西轉崖石俱盤削飛突里餘抵山西南隅峰益嵯峨叠巽中空外聳上若鵲橋度虛攀隙登則怡雲亭廢趾也由其上轉罅梯空穿石鐫上躋石片片懸綴側爲透峽平爲架橋如上竿轉塔無不曲折匠意下至怡雲右卽龍隱巖洞門西向高穹廣衍頂石平覆洞右近口復垂柱環爲層龕重洞

接影深流。此爲最勝出巖。仍從怡雲返花橋。南沿西麓。隨流歷磴半里。入月牙巖。巖西向南。卽龍隱第。此則級石成磴。彼則斷壁斗崖。路殊逼塞耳。巖上環西。缺其口。內不甚深。政以圓缺分明。有同鈞月。下照清冷。亦幽境也。出山街北。過七星。餐於朝雲巖。北度葛老橋。寬屏風山。或有以黃金巖告者。謂去城東北五里。乃買買東北趨三里。過問負擔者。指邨北之山曰。此卽是。至邨問之。仍不知也。及抵山東麓。則削崖列嶂。平展危懸。已轉北麓。得澗門如峽。山頂高穹。兩崖濶五丈。高十餘丈。初南向平入十丈之內。少東南轉。忽明穴上開。自下望之。殆蜃市重樓矣。從此高躋又十餘丈。抵明穴之口。探嫩

遊記

三册上
粵西一

三五

松栝兩崖。開蘇別驛。得程公巖三大字。西有記一。則蓋鄱陽程公崇寧帥桂時所開。志載屏風巖一名程公。至此乃爽然自釋也。遂西向歷級。上登穴口。其內巖頂之石層層下垂。極爲雄峻。將至出穴處。地少平。北與有大石幢。盤疊至頂。色碧形詭。何設奇至此。出穴而西山迴峽轉。石骨森豎。下卽盤峰成窩。窩底一洞。北向。覓徑西南下。抵窩入洞。洞不甚深。卽西踰窩出。兩石峰駢枝並起。一爲石工剝蝕殆盡。一猶亭亭孤立。從石峰東更西南三里。已出葛老橋西。於是循朝雲七星。西麓度花橋。紛傳流警薄。永郡省城戒嚴門已鍵。亟馳過浮橋門。尙半啟。得返寓。

十二日西出麗澤門門外巨塘滙水水自西北城角馬留過
脊處南抵振武門北入陽江石梁跨之曰涼水洞橋橋南北
塘中蓮花盛放坐蔭橋樹下殆不能去予欲覓中隱山乃南
至振武門西度定西橋一里忽路右一山有洞呀然卽北趨
其下前有古寺拭碑讀之西山也洞門南向東又裂石白峰
頂下跨成門乃捨洞趨之其門南北豁然亦如雉山象鼻但
彼急流中貫異於此之外遶澄潭耳然外跨之石欹疊錯出
尤露穎異遂先趨其東抵由北北向亦有洞穿洞而南橫透
山腹竟與南洞貫徹中有夾門垂柱不似他洞徹望竟目也
出南洞洞左疊磴嵯峨循之北躋峰頂石皆峰嶸攢簇中旋

遊記

三册上
粵西一

二十六

爲平凹長若溝洫光滑特異下至南洞前始東入石門門乃
片石下攢中門高闢旁通東巖故以小巧見奇望西峰石亦
聳列從寺後西歷其上歷級南下峰嶸中西循大道三里聞
木陵邨有巖曰佛子遂從西北岐入二里石峰在候山東麓
洞門高懸北抵巖下巖之東二洞南向最東者敞而不深稍
西則洞門側裂外垂列乳中橫一屏屏後深峽下墜屏東西
俱有門可下由峽中北入其竅旁裂漸隘乃復出西上入大
洞洞南下北上穹然高透頗如程公以松枝拭右崖所題則
宋呂愿中題中隱呂公洞詩也後署云假守洛陽呂叔恭遊
中隱山無名洞客有言此洞因君顯當以呂公名之因書五

十六字鐫於壁始知佛子巖卽中隱山呂公洞也由是北躋後穴內雲翼倒翥與洞俱上不作逼隘觀穴口高朗大過程公後穴也北出口石磴二道一東北下山麓予先從其下者北向之麓皆崿峒幔覆外有倒石界而爲門爲窻內蜿蜒旁通繞若行廊複道此下洞以幽奇勝旣復上從西北磴復得一洞洞北入南穹擴然平朗頗似穿巖南一石聳立如臺上有石佛不知其自來佛子巖所由名矣前有巨石柱如屏中峙東西界爲兩門西竅廣正自下遠眺此竅直透北山東則偏隱無所睹巖外循崖東轉又闢一門下臨中洞之上爲關帝座仍由洞北東下穿中洞南出西循山又開南向一洞與

遊記

三冊上
粵西一

二十七

中洞並列由其西攀磴上又有洞南向兩漬磴滑捨之下山東南半里飯木陵民家民謂西南侯山下有銅錢巖可透出前山北向趙家山亦有洞可深入又有陳搏巖頗奇予念諸峰不能徧歷侯山爲衆峰冠其巖不可交臂失遂由中隱舊道西一里抵侯山廟廟後山麓漫衍踏水披叢茫不得洞但見有級上躋鼓興登絕頂山前行者高呼日暮不可登乃遙望大道南削峰東轉有洞東北穹立望之趨南去里許抵其下洞高倚山半前有渚水滙潭潭上拾級攀荆遂入洞亂石堆洞門外外高內深歷石級西南下直墜洞底水涯淵漠內望一石橫突出下有側崖嵌水裂隙受趾予抵突石下畏崖

仄峭滑乃下山轉出其東南山背復有門滙水卒莫定其爲何洞也其處西峰駢聳無侯山之高而峭拔過之暮歸急姑留爲後遊二里南出大道路旁夾道之山上有竅東西透空與佛子穿巖正等亦不及入執途人問前所入北向洞何名則架梯巖一名石鼓洞也紛傳城門已閉竭蹶東五里過木陵分岐處已昏黑又三里抵振武門將闔矣側身入始從容行街市中

十三日入靖藩城過獨秀西巷主僧入內宮禮懺登峰約復移之他日乃出就日門過木龍南洞由其下渡江還望木龍下層復有洞濱江穿麓滌流可愛止江東崖溯流北半里入

遊記

三冊上
粵西一

二十八

千佛閣前有大榕一株問所謂辰山者俱莫曉隨大路東北五里堯山在東屏風巖在南獨辰山茫然莫辨忽北望一山去不一里穹然有洞洞口一石當門赭色斑斕彪炳有異問貧芻者曰老虎山也予謂靜聞何不先了此後覓辰山遂北一里抵山下望高先登由洞口穿入其內天光自頂四射由下北透其腹再入重門支峽後裂層崖上懸俱莫可度南向重門內攀崖上躋遂履層樓徘徊未下忽一人來候洞前下問之曰洞名獅子一名黃鵬巖山前三洞下曰平地中曰道士其此巖爲三出洞見山頂石叢參錯乃循路上躋石片片冰稜鐵色下嶺石稜就夷棘道俱險前候者復趨上引予

左入道士巖巖亦南向在黃鸝東稍下洞前壁左右各鐫詩
拂讀詩序是山卽辰山也穿洞東側門出東向下山東北一
里飯所候者家主人姓王字慶宇訂予宿此束炬肩梯前導
趨辰山北麓爲青珠洞遊洞北向裂峽上並山頂內界兩層
始南入十丈許攀崖上稍西乃豎梯向北崖上躋旣登北入
峽中五丈餘透出橫峽峽東西橫耳上高俱不見頂東行四
五丈漸聞生光一大石柱中懸繞出柱西峽又南北裂南入
臨洞底北出正臨洞門上洞門中列二柱界爲一門兩窻延
耀內射正當圓柱予詫爲奇導者曰未也轉進橫峽口又西
行四五丈有竅南入甚隘悉去衣赤體伏地蛇行以進其穴

遊記

三冊上
粵西一

二十九

長三丈大僅如筒又曲折中多懸柱時從遊兩人以炬先入
次及予度稽一時過隘洞復穹然上崇下陷俯躬南降垂乳
紛列迥與外別導者曰未也又西踰一梁梁橫南北若闕越
梁西下石乳愈奇西窮復轉北上蔘續滿眼彌轉彌勝此洞
與山南黃鸝巖正南北相當然一山皆空環峙分門者尙多
也北向開洞門者三此爲中東西二門俱淺東向開洞門者
五北爲高穹中爲三曲狗頭南爲道士東峽和合小巖而三
曲最深南向者三卽平地道士黃鸝也志稱辰山有洞三級
第指其南耳惟西面予未之窮出青珠洞過北洞一東麓洞
五循南入平地巖初入欹仄側身緣東隙而上內境旣穹外

容一人由西麓上山腰透入飛石下旋躡其上卷石爲橋以達洞門門西北向門內洞界爲兩南北並列北洞後卽通隘透腹處隘長三丈旣入卽寬闢爲巖懸乳垂蓮紛綸左右東巖上下俱極崇削下亦有深洞路當山麓南轉始得東上予旣晨餐西北望黃金巖甚近亟趨之不復東尋下洞也下西麓過竹橋由邨右西北行三里抵巖之陽山骨立路北下卽裂爲洞南北交透前卑後峻後門之半石橫架空中門界爲二由洞內上躋北出架梁之下俯瞰北麓拖劍水直齧其下土人俱指此爲黃金巖予南下出洞西復有洞南向高裂深入不透僅如重峽已從西麓北轉山西北垂亦有洞西向中穹不甚深透對面有東向一洞與此相向若門廡對列洞內分四支如十字東北二門外透而明西南二峽內入而黑然西北皆懸崖上奧東其所入南乃深潭也拖劍水在東峰北抵此洞前轉北循山當洞有橋跨之橋內滙爲池亦山叢水曲之奧出洞不知其名問汲水池中者曰此洞不知何名上更有一洞可尋躋也亟披箚透崖上南北兩石屏並立起微徑界其中甚峻洞峙南屏後門亦東向不甚宏洞有舊鑄黃金巖三字可辨是洞始爲黃金前乃其東峰之洞也出門左見北屏內峽有路上躋爲宿莽所翳雨濡蔓濕不堪置足予強登之南轉卽上洞也門北向門外棘蔓交絡縷分之乃得

入天則旁竇外通重樓三疊度閣之石板裁蟬翼薄然無級
隙可攀惟中洞之內旁竇玲瓏懸隙宛轉可穿而上第甚隘
層折難舒於是解衣蛇行遂出上層平度閣上踞洞口飛石
高呼靜聞乃下廻望黃金巖西北麓諸洞尤多乃隨拖劍水
遶出北麓又得北向洞二西向洞三遂西趨屏風山將渡拖
劍水望屏風黃金兩山中又南界一山下有洞北向迂道從
之洞亦旁分兩門一北向一東向西有級上躋再上級崩路
削又有洞北向乃下抵西北隅則旁透中空之洞峽連闢與
黃金西北同正西一洞高穹層裂紛拏傑張此又以雄武見
奇非尋常窈窕窟也問之土人知爲飛石洞遂西渡石堰一

遊記

三册上
粵西一

三三二

里入程公巖北二里仍飯王慶宇家西再探道士巖諸洞過
屏風西麓至是已四周其山入浮橋門浮橋共三十六舟云
十九日始定陽朔舟

二十一日日中乃行南過水月洞東又南雉山穿山鬪雞劉
仙崖頭諸山皆從陸遍遊者惟鬪雞未到今舟出其東麓崖
頭有石門淨甌勝舟隔洲以行不能近悉去省已十里崖頭
之南江流浩然自放又東南二十里過龍門塘南岸有山嵯
峨中峰最高處南北透東五里橫山巖突立江右又東南十
里江右削崖屏立南五里至碧崖巖巖南石峰隔江排立起
橫陣南天上分危岫幾埒巫峰五老扼江使東江流嚙其北

麓怒濤翻壁赤壁采石失厥雄麗崖間一石紋黑縷白章成
泛海大士曰沉香堂其處南雖崇深極致北岸猶夷豁共五
里下寸金灘南轉入山峽江自是左右皆石峰噴岌爭奇炫
詭入峽下斗米灘五里爲南田站當臨桂陽朔界山遂轉峽
爲塢四面層圍僅受此邨過南田山色暮合舟人夜棹不休
江爲山所泥侷南侷東盤峽透崖凡二十五里抵畫山月猶
未起山隱空蒙中又南五里爲興平月從羣峰東隙出舟泊
候曙漓江自桂林南來兩崖森壁廻峰中多洲渚分合無翻
流之石直瀉之湍故舟行屈曲石穴間無妨夜棹第月起稽
緩闇行明止未免悵悵

遊記

三冊上
粵西一

三

二十二日蚤起曉月光流奇峰合棹南三里爲螺螄巖一峰
盤旋上轉峙江右興平水口山也又七里東南出水綠邨山
乃斂鋒子掩蓬就窠南三十里則龍頭山復錚錚骨立而陽
朔四圍又攢作碧蓮玉笋世界矣陽朔北自龍頭南抵鑑山
二峰巍峙當漓江上下流中有掌平地乃東面灑江以岸爲
城而南北屬於兩山惟西南疊垣爲雉城西山最近者爲來
仙洞石人牛洞龍洞諸山通省大道從之蓋陸從西水從東
也其東南門鑑山下則南趨平樂水陸並道正南門亦西北
轉通省道直南爲南斗山延壽殿旁建文昌閣無徑他達正
北卽陽朔山層峰駢峙東接龍頭東西城俱屬於南隅北則

以山爲障，竟無城及門。東北一門，在北極宮下，僅東通江水。北抵儀安祠，讀書巖然，俱草塞。人罕行其徑，惟東臨漓江，開三門以取水焉。予上午抵城，入正東門，從文廟西入縣治，蕪寂殊甚。縣南半里有市橋，橋下水西自龍洞入城，出橋東，卽懸流注深壑，壑大四五丈，四面石盤突，是爲龍潭。但飛流下搗，不見下流所溢。潭東卽城，大江流城外，蓋地穴潛通也。橋南鑑山獨聳，一名易山，卽南借以爲城者。東麓有鑑山寺，寺倚山臨江，通道置門，卽東南門也。西麓則正南門，予初抵北麓，覓道上躋，南東二面就崖爲城，惟北面在城內，有微級，久爲莽棘翳沒，乃攀條捫隙，直造峭壁下，莽徑并絕，復出其

遊記

三册上
粵西一

三十四

旁躡巉石，盤旋半空，終迷所欲登，乃下。時顧僕守舟，期東南門外，於是南經鑑山寺，出東南門，覓舟不得，渡江東一里至白沙灣，舟泊其南，乃下舟。白沙灣去城東南可二里，民居盛於城，有河泊所，其南三峰列峙，最東一峰曰白鶴山，江南抵其脚，曲而東北，抱此一灣，沙土雪潔，其東南一溪，南自二龍橋來，北入江，溪在南三峰之東，逼白鶴西趾出，溪東又有數峰，自南趨北，界溪入江口，最北者書童山也。江以此乃東北逆轉。

二十三日從白沙依江東北行，一里南渡江，已出東界山之東，江東北岸有高峰，轟四尖起，特障江南趨，既渡陂塘高下。

林木翛然有澄心寺可憩東一里過穆山邨復渡江而東循四尖南麓趨出其東山開目曠奇致愈出前望東北又起一峰上分二岐東岐若僧帽垂空西岐尤高聳四尖東枝銳若脫穎與二岐西岫建標絕頂各見雄振迴眺西南隔江下皆尖崖並削上懸雙岫此卽書童之南東界羣峰所幻出隨江東五里出二岐東南踰嶺下是爲佛力司司當江南轉處北去縣十里問之居人始知二岐西峰最高者爲狀元峰乃仍踰前嶺北去西一里抵紅旗峒竟峒西北一里抵山下北上斷磴間三里踰山坳坳乃東西峰分岐處西北度亂石重蔓直抵高峰崖畔有洞東向門高穹上懸竅兩重簷覆出無由

遊記

三册上
粵西一

三五

得上洞前東向之峰卽似僧帽者其峰亦有一洞西與北山對懸壑隔莽竟阻不得達予必欲一登峰頂南北俱壁立絕磴從洞南緣峭梯險轉從峭壁南直抵崖半則穹然無片隙不復手足力所及遂下飯佛力肆居人蘓姓者謂此峰懸削曾無登路數年前峰側有古木一株其僕禱而登組級備窮峻阨然止達木所亦未造巔後遂問津者絕轍乃返白沙灣佛力司之南山益開拓內雖石峰離立外俱排山亘嶺桂林秀出雲峰南盡於此聞平樂以下四顧皆土山巉厲之石不挺於陸而藏於水山自此而頑水自此而險也

二十四日由白沙截江渡南峰下循麓東南又轉一峰有巖

高張東向爲田家洞卽在白鶴山下軒朗平豁上繁垂乳白
鶴東對書童山排闥而南內成長塢塢中丹行六十里可抵
二龍橋出白鶴循北麓溯江三里入東南門肩炬由正南門
出西北循大道向龍洞巖二里東越小橋有兩洞西向其南
列者爲龍躍巖地稍下門極危朗北洞地稍高草塞門徑先
入南洞東五丈層陟一臺臺右有竅深入出由洞北登龍洞
巖熱炬入洞濶丈五高一丈南崖半壁平亘如行廊入數丈
洞乃南闕頂始高後壁下方圓池各一深五六寸泉澄明如
鏡屢斟輒滿池上連疊小龕俱無通道處由左壁窪陷處伏
地入漸入漸小穴僅巨管大蛇行南透五六丈始可屈伸已

遊記 三冊上
粵西一

而遇旁裂龕得宛轉達躍龍後腋出洞東望龍洞南列峰閭
闔重啟異之遂渡溪東行棘莽沮洳中共一里抵山下初入
西向第一門高穹如峽東入數丈北轉愈昏黑莫窺乃南轉
得明穴西透西出洞門之上蓋南上西向第二門也由其外
更南上西向第三門洞東入成峽如初洞峽底迨仄峽上層
疊有同閣殿入五丈下峽旣盡上懸重門圓整擬瓊瑤第峽
壁峭削無可上與靜聞索慮躋躡得上峽一層最上層仍懸
亘莫達出洞前仰望洞頂又連啟兩門此又南上西向第四
門第五門也冀其中下通峽內重門於是又過南上西向第
六門仰望懸崖倍高削彌難慰卽又過南上西向第七門見

石紋層巽，突出者可置足，竅入者可鈎指，遂反躬上躡，裘數
十級，抵洞門。洞北又夾坳，豎起高五六丈，始入上層。其夾光
膩無級，計絕所攀，予獨審視周夾，雖無級，而夾壁宛轉，可
以手撐足支，不虞懸墜，遂聳身從之。如透井，皆橫縳，縱發不
階級，磴也。既升夾脊，其北復墮成峽，穿映明透，知與前所望
洞必有一通。因騎墻坐，上睇洞頂，四達高呼，促靜聞。久之至，
教之如前法登，同從脊北下峽中。峽底平，曲折北進，西上高
懸一門，則第六門也。不及上，循峽更進，轉西出第五門。門有
石龍下垂三四丈，由龍側北循崖端，得第四門。穿門東入，稍
下。次層中廓然四闢，右向東轉，深黑無窮。左向西出，卽前第

遊記

三册上
粵西一

三十七

三門上層也。知重門若剗處，當在其內，循崖窮之，復隔一柱，
轉柱隙入，門內另環一函，不遠亦不透也。自第三門上，連闢
四門，初俱攀躋無路。一入第七門，宛轉俱達，升陟重樓，複閣
間有莫公臣者，徧題珠明洞云。仍從第六門峽內，西向攀崖
上，門雖高張，內外都無餘地，不若四五二門外懸臺榭，內疊
樓楹也。乃逾脊南下第七門，門外循崖復南，又得南下西向
第八門洞，亦成峽。東上雖高峙，鮮所窈微。此山西向八洞，惟
南北二洞不交引，中央四洞最高，紛紜曲暢，較他處一二洞
勾連，輒攬奇譽，真霄壤矣。下山循麓南半里，路東西各一峰，
屏峙，遂山南門抵市橋，入龍潭菴。莫姓者隨予至，問遊巖樂

乎子以珠明巖誇之曰牛洞也數洞相連然不若李相公巖更勝卽在西門外不可失予仰視日尙高亟出西門攜火炬從岐北行復西岐已繞此山東北兩面蓋卽前屏峙路旁東峰也繞至西麓洞正西向西峰門右鑄閩人李杜記題爲來仙洞入洞東行不甚高爽南轉遂昏黑秉炬東南入乳竇初隘漸進愈宏放瓊葩雲葉繽紛上下東北轉成穹峽高不見頂其垂突蹲裂各極開勝益深峽忽下墜淵昧不可以丈計炬火星散投之沉沉杳不得其底其左削崖不能受趾右乳柱紛楞窻戶歷歷隔崖探以炬內若行廊玲瓏似可遠達松光將盡乃由舊道出東入西門出東南門渡口桂林舟人已

遊記

三册上
粵西一

三八

蟻舟待遂下舟宿

二十五日舟過水綠邨北七里西岸一巖門甚高敞東向臨江前垂石成龍曰蛟頭巖由巖右峽深入漸高黑由巖左登前亘爲臺後結一竇尼棲之竇後深陷成峽以無炬返時舟已先移待輿平出洞循麓溯江半里達螺螄峰下繞峰東麓又二里及舟北過輿平二里泊

二十六日北五里抵畫山山橫列江南岸江自北來至是西折山受嚙半剖爲削崖石質錯綺成章舟人泊舟晨餐子乃登其麓與靜聞選石踞勝崖半洞北向望之甚深高下都無着足處返而登舟北上小散大散灘至鑼鼓灘共十里其山

南巖竅有水出緣突石飛下墜江勢同懸瀑粵中皆石壁
拔起水隨四注無待破壑騰空此瀑出崇竅尤奇絕又北八
里過攔洲西北岸一峰純透初望之疑卽龍門穿穴以道里
計之始知另穿一峰前以夜棹失之耳又北三里爲冠巖先
是江東岸巔崖丹碧煥映采豔畫山冠巖卽在其北山上突
崖層出麓穹一洞西向臨江水自中出外與江通棹舟入洞
門甚高內更宏朗悉懸乳柱惜通流之竇下伏無從遠溯久
之棹舟出洞望隔江羣峰叢合憶前攔洲所見穿山當正對
其面惜溪迴山轉并其峰亦莫能辨識頃之忽北見皎然一
穴另懸江東峰半卽近在冠巖北亟登岸趨之期舟候南田

遊記

三冊上
粵西一

三十九

站一里抵山腋踰嶺度明穴在東南面絕崖不可攀反循崖
北稍下則洞果南透其山甚薄上穹如合掌中罅北下俱巨
石磊落南則削崖懸亘故登洞道必由北洞東皆旁門複室
東北彌深仍轉洞西北隅又得一洞南北橫貫其北峰之麓
透而不敞仍南出西北行平疇中其西隔江屏立者皆穹崖
削壁陸路望之更覺崢嶸東則石峰離立後托崇巒共四里
至南田入舟

二十七日經橫山碧崖諸勝舊遊如昨橫山巖東向右腋有
竇旁穿而南南復闢一洞甚宏有門有奧奧西上則深入昏
冥奧之南墜皆嵌空透漏門在墜奧東廓然凭流與前門比

肩立。又西北過龍門塘，南望橫山巖，西透頂峰，雖似穿石，無從上躋。夜過新江口十里泊。

二十八日，昧爽亟推篷，已過崖頭山。十里抵水月洞，北城下入浮橋門。

二十九日，入靖藩城，訂獨秀期。王僧詞甚遼緩，予初擬再至省，一登獨秀，卽往柳州。至此失望，悵悵。

三十日，炎威莫支，倦卧寓所。

六月初一日，訛傳流寇薄衡，永藩城愈戒嚴。予遂無意登獨秀，獨秀山北面臨池，西南二麓，予俱已遠其下。西巖亦已再探，惟東麓與絕頂未登，其異於他峰者，祇亭閣耳。

遊記

三册上
粵西一

四十

初二日，同靜聞再爲七星樓霞遊。由七星觀左入，卽登級爲碧虛閣，閣在摘星亭左。予昔遊急於七星，以謂此軒閣無煩殿齒。後累經其下，上見巖石倒出，異之。至是遂先入，仰視閣上，爲瓦所掩，不見巖頂。旣轉入元武座後，豁然透空，高跨頂上，如梁類穿山。月巖惜人坐閣內，不見出閣後石垣外。始見亂峰飛石，森列互映，訊閣僧後山道何向，曰：須南自大巖菴，乃出。仍登摘星亭，入七星前洞。由閣後東上，數十級得小坪。石盤其中，遂北轉透重門，出門東壁外，崖裂竅懸雲。予亟解衣上，連躋重龕二層，俱列戶，疏橋勢同垂幄。北下，卽棲霞洞盤空西向矣。此山巖洞駢峙，栖霞在北，下透山之東西，七星

在中曲透西北出碧虛閣在南亦東西上透三穴並懸六門各異北又有朝雲高峙兩巖皆西向此七星山西面之洞也洞凡五下栖霞南入大巖菴望碧虛巖後山石叢薄可由菴外東北登遂從菴右草坪中上其一里得坪一區小石峰環拱之秀薄層雲西即碧虛巖透明穴北即七星山頂與餘峰攢成斗列者覓小徑出東南坳中下山其一里得一巖東南向西下即曾公巖也曾公西又有洞在峰半攀莽上洞口亦東南向初由石峽入得平展處稍北轉外復有龕東列後則穿門西入內益崇空深轉杳不可睹遂下山出花橋東街此處巖洞駢峙者亦三曾公巖北下同列者又有二巖予昔遊省

遊記

三册上
粵西一

四十二

春先經此俱東南向此七星山東南之洞也洞凡五若北麓省春三巖會仙一洞旁又淺洞一俱於前日履經者則七星北面之洞也洞凡五一山凡得十五洞云返寓於肆得桂林故勝西事洱百粵風土記諸書按部考勝者竟兩日

初五日讀清秀巖記即出西清門覓之門在西北隅城外削崖之半有洞西向出渡城濠壩西有二岐一循山北行即北門西來大道皆石峰突峙其北片片若削下開大洞西南向曰橫洞一從山南入峽疑即清秀道遂南西行一里峽南北山俱中斷開徑四交徑西北有洞南向覓道北入愈入愈深旁絕他竇夾危底平灣環以進莫測幽際出問行者曰黑洞

也。問清秀何在。曰：正西有山屏立峽中者，下有牛角洞。由北徑出峽，有塘曰清塘。西南瀕塘爲下庄洞，無所謂清秀者。子意清塘當去清秀不遠，遂北轉從大道出峽。峽門東西崖俱有小洞，無徑道可登。北出臨塘，潄水一泓，浸山西北麓。循之西路南嵌崖末，北俯淵碧，忽一岐南上，攀躋漸高，設磴仰望，都無懸竅，知非洞所在。乃下出塘之西，其南山廼塢，轉別成一壑，門殊杳然。仍返過黑洞，西向屏立峽中山一里，抵屏東北，卽有洞斜竄，門東北向，南下漸窅，昧爲牛角洞。出洞，遶屏北而西，轉出南麓，屏南崖峭削，色黃赭，下有窪，潄水從山麓石崖出，崖不甚高，中若崆峒，卽牛角洞南通穴。至此墜成水。

遊記 三册上
粵西一

四十二

窪也。又東抵南峽門，北入，問清秀於道上人，其人曰：惟北峽有清塘，上有洞，南與黑洞通，此外無他洞。乃悟清秀所托，必不出北峽。時已當午，遂捨之。南炊隱山，西過西湖橋，一里抵小石峰下，峰片峭裂，中界衆峰間。南瀕陽江，東北西三面俱短垣環之。從西北隙踰垣，披其東北，抵小峰南麓，峰雖小如蓮之間，瓣列房半崖坪中，有石高丈許，如犀一角，獨聳後，又盤空上，片攢支削，尤增奇幻。搜剔久之，出問其名，曰：秋兒庄。西卽陽江西來，有疊堰可渡。南卽趙家山，穆陵邨中隱諸洞云。循陽江北岸，西一里爲獅子巖，西又聳一峰，與獅巖夾有巖，東向，凭峭石之上，中垂一柱，旁樛裂，正東瞰獅巖首，北轉

又一洞北向高穹曰天慶巖由級南下中亘壁界洞爲兩入數丈兩峽復合其北峽之上重門復竅懸綴甚高望不可攀登此可直通山南北出洞西北行石山叢薄間山俱森立圓聳松陰石影又北里許經石山西麓兩洞北肩西向捫棘入南洞進五六丈轉從北洞出仰望洞上飛崖片片欲舞爲蝦筓山西有林木迴叢平疇陽江西環之王太守園也仍從雙洞南東北向登得石磴一里踰坳西攀石鏘上所攀石銛若劍戟石斷崖絕中俱棘刺遂出舞空石上瞰北麓斗懸難下尋舊磴下西麓繞出其北東一里至宋家庄出牛角洞南北過北峽門北眺西峽半有洞呀然當卽清秀暮色已迫遂趨入西清門

遊記 三册上 粵西一

四十三

初十日始出振武門取柳州道西五里過茶菴菴南小徑二里至琴潭巖巖東有邨土人俱訛爲陳搏余得桂勝方信儒記云得清秀玉乳琴潭荔枝四巖故前日首索清秀幾及復失以下三洞無知者予疑陳搏卽琴潭及今抵其邨覓一人爲導聞東南有七寶巖先趨之乃東南渡南溪上流共三里至李家邨邨南石峰西向巉突巖不深而峭蓋在南溪白龍洞正西向遊白龍洞時西望羣山迴曲處也返陳搏邨導者負松明并梯至西趨小山南先觀水洞門南向水滙其內浸洞口洞中衍四窟皆水所際其左深入洞前左崖瀨水趾刻

琴潭二大字卽信儒筆洞左復開一門後與洞通中多列柱垂葩嵌空虛度予旣得琴潭知荔枝巖不遠導者篝火執炬請遊幽洞徵幽洞何名果荔枝巖也遂出琴潭沿山左瀦塘行遶塘北轉而西至荔枝巖門東向不甚高西進數丈循洞底右竅入其下穴有方池四旁甚峻再東南轉平入數十丈兩度低隘右崖半一竅高濶僅盈尺內洞平窅瀦水齊竅引首竅中東望其水廣邃中石龍蜿蜒南崖石盆一方平度水面不能以身入也仍出至洞底少西進循右一竅入上峽東有石幢圓立繞出其後忽度爲兩層下穴少西轉輒止上穴以梯上躋內復列柱分檣穿檣少西遂下南峽中平入數十

遊記

三册上
粵西一

四十四

丈又南旋成龕龕外洞頂亦復龍形夭矯仍出洞底又循北竅入上峽則層壁紛垂懸蓮徹柱雜然綴壁大抵此洞以幽闕見奇而深入在右水竅側小石彈丸大多磊落痕稱荔枝以此出洞西北三里抵大道平塘街其西石峰峭甚夾立如門南峰山頂開穴達山腹予向尋銅錢巖過此神動今亟問道知道旁油坊後轉東南至古廟可登乃曳杖過油坊南無徑可入逡巡得蛇道伏草間隨山麓東行南轉將抵古廟見有路西上從之始捫級旣乃梯崖崖窮陟峽棘蔓擁沒髻頂鈎不能出久之抵叢石崖下其上分形設詭計透明之穴已與比肩乃橫陟而北愈轉愈出峰頭俯瞰嵌崖削窟反在其

下。下有高呼路。悞指予下踐之級者。隨其指下。呼者乃二牧翁。云登崖道。尙在古廟南。遂從廟南。歷級上。西南轉出山坳。間眺其南。一峰枝起。頂豎一石。高數丈。予所見石峰。綴立。雁宕翔鸞。龜峰靈芝。及此地。笋石駢發。未有靈怪。至此者。度已出崖後。遙瞻石壁下。猶未見洞門。日暮遂返。宿平塘。期明日導遊。

十一日。從古廟南登山。導者揚鑣斬棘。共一里。抵昨返步處。石隙中登數步。望見洞門。西南向。又攀石崖數步。卽入洞。其門前向東北。後向西南。徹望通明。後洞正對豎石峰。導者謂洞曰榜巖。山曰楓木。云下山。過古廟南。由田塍中渡。西來小

遊記

三冊上
粵西一

四五

澗。水自兩路口。西塘迤邐。東穿山麓。卽南溪發源也。東南入石巖洞。門西北向。後門東北向。中空洞旁裂。後門右崖有臺架。虛上又盤蓋隆起。悉窳櫺隱透。出後洞。北一里。仍抵平塘街。街北石峰。噴吼若屏。東隅有崖。東向。曰社巖。街西北尋銅錢巖。卽前所遊鼓架巖也。西二里。經兩山峽。峽北山巍然。負展。下爲廣福王廟。峽南山東有巖。門東向西出峽。是爲兩路口。市肆盛列。西北爲義寧道。予往柳州。則從西南永福道路。東有巖。西向。門甚紛紜。多所像類。西四里。路右小峰。如佛掌。高擎下合。上岐於衆峰中。尤詭異。其南又駢峙兩山。東成峽。峽南之山。東層裂。兩巖上巖。明透山後。亟南趨之。祇下巖可

入上巖懸疊莫登乃入下巖巖中列柱牽惟爲峽爲窻轉透
其後亦橫貫山腹予意由後竅西出可攀躋上巖透處乃上
下俱削旁絕階援仍東出洞前東北隅石頗坎坷披隙登上
層則前後二門俱與下巖並列門內乳幄蓮柱左右環轉以
達後門數丈之內紆折無竟前門一臺正對東北佛掌峰凭
後門龕牖遙瞰西南塢外之奇收攬都盡予所見重樓之勝
此爲第一既下西向行又見重樓北麓復有巖北向此峽南
之山也在峽北者西向亦有二洞層列洞門俱石色赭黃獨
爲標異但一出峽滙水直浸兩峽西中疊石堤亘水面旁皆
巨浸無從渡水一登赭巖既又聞有八字巖亦不能至遂由

遊記

三册上
粵西一

四十六

石道西向行滙水中望西峰之東崖壁高亘上懸三洞相去
各二十餘丈俱東向駢列其山在滙水西南與東峽南峰東
西夾塘成滙遙睇崖端俱有微痕自南之北可上躋惟北洞
嶄然懸絕不可階升遂循堤西草徑傍水而南已抵南洞下
梯崖入洞門甚崇內崆峒宏峻規模迥別稍下一岐由右入
西南轉漸昏窅莫窺底止一岐由左入不五丈一門西透山
後一門北通中洞先西披後巖洞門高與東埒上下俱懸崖
斗巘遙望西南對山亦有洞若覆梁門廣中邃曰牛洞東向
黯黑而不知其涯仍入內北上中洞洞亦北轉而東透探其
北轉至洞門有石內度架爲兩層上疊閣倒向洞內下裂門

嵌壁間卽所望北洞也。仍入中洞內，東臨洞門，門愈高穹，下則崖危路絕，遂循南洞出。由舊級下一里，北出大道，西循南山北麓行三里，越一平坡，其南北巖洞甚多，不暇詳步。南至通城墟，又南一里，爲上巖後洞。門北向前臨深塘，入其內，廓然崇宏，峽分左右，進右峽，下墜爲淵。石壁東西夾，峻不可下。其底南眺沉沉，壁西之崖，迴覆淵上。予所駐足下瞰者，壁東則絕壁之下，駢通二穴，若環橋連亘，水通其中，不知所往。北則石壁自洞頂下插淵底，壁半裂，柱成隙，泉淙淙隙端下注。出右峽，由左峽上入，則蹲石當門，中聳爲臺，臺上一柱支洞頂。路從柱南北入，內復有石崖自洞北南突，若塞門。與洞南壁夾成罅，路循崖南西出，繞崖後，外穹爲門，門下橫闕，而上多垂簷，踞闕坐。門外峽復峭峙，兩旁多倒懸下攬之石，若龍爪猿臂，紛拏其門。俯仰兩絕，出洞循其東麓，復開東向門。內窪下，滴水空聲，轉南漸黑，當卽通後洞。環橋水穴者，洞南則上巖邨，邨後疊石開徑，曲折上，爲上巖前洞。門東向，高齊後洞肩，深折不及，洞側有臺趾，由臺直躋洞後，迸竇成龕，垂石如距，有垂至地下，離一線者。有中懸四旁，忽卷者，有柱立輪囷其中者，有爪攬分出其岐者，其東南對山，有泉源，曰龍泉。云下洞仍出後洞塘北，西向入，東來大道，度高橋，共十里，至山蚤鋪，其四旁雖土阜間出，石峰兀突焉。又三十里，抵蘇

橋爲洛青江上流水始捨桂入柳去予遂與桂別

裔孫 熙海南校字

遊記第三册上 終

遊記 三册上
粵西一

四十八

遊記第三冊下

江陰徐宏祖霞客著

子別姓
李

寄介立 輯

季夢良會明編

後學湯 裕帖瞻

重校

同邑

楊名時凝齋閱

族孫徐 鎮筠峪

粵西遊日記 二

丁丑 六月十二日自蘇橋登維容舟順流西南五十里過永福縣又八十五里泊新安鋪。

十三日一百二十里抵維容縣陸去柳州府五十里水須三日溯柳江乃至遂定騎為明日陸行計。

十四日出城南西二十里為高嶺鋪南寨山秀立其南乃南

遊記 三冊下
粵西二

一

折登嶺共五里直抵南寨山西柳江逼其西崖舟人艤舟以渡有小溪自南寨破壑西注柳江曰山門冲江東西為維容馬平界去治各二十五里登西岸瀕江南向行為馬鹿堡東望隔江南寨山分枝聳秀亭亭露奇又五里西向踰坳入則石峰森立夾道南峰曰羅山頂北向有洞斜窻開兩門仰眺無躋攀路西麓又有洞駢峙其北峰南面峭削尤甚西二里小峰中夾立曰獨秀峰迴眺羅山西麓洞心異之遂從岐東南披宿草一里抵羅山西南角東轉循其南麓北望山半亦有洞南向高少遜北巔而面背正相值轉山之東踰坳北入一坪中開其右峰北巨石數十丈斜疊起衣折古勁逼肖左

崖之北雙門墜峽下內洞北向深削成淵底伏流澄徹兩旁俱削壁數十丈南進窅然莫窺其源北抵洞口壁亦斬絕上有橫石高二尺如闕可坐瞰其底無能踰險下也北出峽門上有道直上西峰得石坊坊後有洞東向中甚高平寬朗探其左北轉漸黑隘右則西上愈昏邃冀後有透明處久之不得出仍從石坊共二里轉是山西麓先入一洞門西向左轉而西進黑不可捫乃右轉東下窮於水出洞又北卽向大道所望洞洞門亦西向連疊兩重洞外一大石橫卧當門峻不可踰北有隘側身以入爲下洞中懸一石復界洞爲兩南北列先從南門入稍窪下南壁峻裂非攀躋可及北崖有微隙

遊記

三冊下
粵西二

二

正穿入北門內內亦下墜東入洞底水聲汨汨與南洞右轉之底下穴潛通由北門出仰視上層石如荷葉下覆虛懸徑絕上躋復從南門側左穿外窾得旁龕龕外有峽對峙相距尺半其上南卽龕頂盡處北卽覆葉端從峽中手攀足撐遂擬虛凌其上上層洞東入不深惟洞北裂崖成竇環柱通門石質乳態各各翺變攀隙西透崖轉南向開二楹下跨重樓陽朔珠明外此爲最出洞返獨秀峰下西向大道馳五六里北望兩尖峰亭亭夾立南則羣峰森繞中有石綴出峰頭纖幻殊甚又西五六里柳江自南而北卽郡城東繞之江也西渡江二里入柳郡郡三面距江故曰壺城江自北來復北折

而去南環甚寬北夾束形正與壺等寓郡治西因靜聞病臥
予亦數日不出

十八日始出大南門渡江江之南稍西爲馬鞍山最高而兩
端並聳爲郡案山稍東爲屏風山形伏處方正東北爲登臺
山則又高乃扼江北轉者也馬鞍山尖峰聳削曰立魚山山
特起南復有山映之非近出其下不能辨立魚當賓州大道
在城西南隅由山東北麓躡級盤崖上巖門東向踞山半門
外右上復旁裂一龕若綴閣其左下拾級數層又另穴一竅
雙峽夾壁高穹直上皆門以外景也入巖張巨吻中寬夷整
朗後通兩竅一南一北皆穿腹西入先由南竅進內忽穹然

遊記

三册下
粵西二

三

高盤西復透一門踰闕出西臨絕壑遙睇西南羣峰開繞延
攬甚擴由門右穿峽竅以下復有洞西向石柱中懸柱後穴
卽前洞所通北竅也門內左循巖壁上洞橫南北勢愈高盤
頂有五穴乘空紛若列星其下東開一穴前達僧棲置鍵不
通行稍南西轉下峽復西透一門前亦下臨西壑門左轉入
內亦下墜成峽直迸東底深峻不可下緣其上捫崖透腋又
南出一門前一小峰枝起與大峰駢立成坳從其間攀崖梯
石直躡立魚巔是洞透漏山腹東開門二西開門三南別者
一頂懸側裂復十餘穴真異境矣遂仍出前洞門右歷級南
上少憩僧廬東瞰山下塘匯水一方內沁不知所去東北所

對者卽馬鞍山西北麓爲仙奕巖居人祇知馬鞍不復曉仙奕實無二巖也東南所對乃馬鞍西北枝峰峰有壽星巖巖後重巖廻復爲馬鞍輿境非一覽可盡子欲候靜聞并仙奕俱留爲後遊

十九日留顧僕伴靜聞寓中子獨挈囊爲融縣遊出西南門得沙弓小舟同舟者明晨行竟宿沙際

二十日上午始發舟由城西北溯柳江江之西鷓山亭亭獨立曠野中自柳郡西北兩岸山土石間出土山迤邐間忽石峰數十挺立成隊所異陽朔桂林者彼四顧石峰不受寸土此則如錐處囊中尤覺有脫穎異北二十里泊古陵堡

遊記

三冊下
粵西二

四

二十一日過杉嶺江右尖峰疊出共五十里抵柳城縣城西江道分爲二自西來者慶遠江也其源一出天河縣爲龍江一出貴州都勻司爲烏泥江經忻城北入龍江合流至此自北來者懷遠江也其源一出貴州平越府一出黎平府流經懷遠融縣至此二江合爲柳江所謂黔江也下經柳郡歷象州與鬱江合於潯今分潯州南寧太平三府爲左江道以鬱江爲左也分柳州慶遠思恩爲右江道以黔江爲右也然鬱江上流復自爲左右二江則以雲南交水南盤江爲右交趾廣源州麗江爲左也二江合於南寧西合江鎮古左右二江指此今則以黔鬱分耳南盤自交水下田州至南寧合江鎮

合麗江是爲右江北盤自普安經忻城爲都泥江入黔江經象州至潯郡合鬱亦爲右江是南北二盤在廣右俱爲右江但合非一地耳雲南志以爲二盤分流千里至合江鎮合則誤以爲南寧左右二江俱源自盤江不知南盤無關於麗江北盤且不出合江鎮也下午自柳城北溯懷遠江入又十里抵舊縣

二十二日暑雨時作僅行三十里

二十三日西北十里過草墟江右崖壁甚峭秀又十里江左山崖廻亘內遙峰森列橫合天半於是舟反東北轉十五里抵沙弓融縣南界也江之西南卽爲羅城縣東界西望隔江羣峰滙聚處皆羅城道中所由也

遊記

三冊下
粵西二

五

二十四日仍附原舟向和睦墟先是沙弓人謂明日乃和睦墟期墟散有融縣歸舟原舟亦往墟買米故仍附之行舟自沙弓西卽東轉北一里有江來自西北舞陽江也內灘石甚險又東北九里抵和睦墟已散不得舟得一荷塩歸者乃附囊與之行北二十里大道直北向縣而荷行李者家東梁西北遂同西北行二里上雞籠嶺西大山曰古東山山東北隅爲東梁抵縣大道所經也越雞籠三里抵其家去真仙巖尙十里去縣十五里

二十五日北取真仙道過讀學巖巖有二門俱南向東西並

列相去數丈外障駢崖中通橫穴若複道行空蜃樓內朗垂
蓮倒柱鈎連旁映甚軒爽可憩西有小石峰特起田間旁絕
延附亦有門東向并越水畦入之初入覺峽逼無奇穿門西
進鏘迸十字西既通明南北俱裂竅土人架木竅間若欲爲
懸閣以居者又西循溪陸里許抵赤龍巖巖北向高穹山半
洞前北突兩峰洞當其中高曠宏邃底平而上穹門內石臺
兩重界其間洞右列柱分櫺別成歇室中洞直入數丈脊稍
隆起成仙田中每貯水更入漸窞黑聞內門東如竇止容平
身入入則廓然通別竅恨不攜炬一竟其奧山前有溪自西
來分兩派東抵東梁北匯安靈潭爲靈壽溪上流云下山北

遊記 三册下
粵西二

六

越溪北山有洞駢立門南向雖高穹側裂中乃下旋如墜螺
門外右躋復飛嵌懸崖越登凭蹠乃下此山正與赤龍南北
對讀學則東西肩列北趨間道正由此山讀學兩峰中此山
東隅復開東向兩巖曰鐘洞巖北巖淺峻若豎鐘剖其半南
巖門高層穴屢引上透無級入下洞當門巨柱中懸環轉無
餘地遂下直北趨二里越一脊脊北爲百步塘尖峰四列中
開平壑一圍循山右轉又一里山分突三峰北向列西一峰
山半洞門西向舍之中峰洞東向東峰洞西向先登東峰洞
洞南北迸橫峽斜竇有石自山巔下嵌峽底四面可繞而出
次登中峰其洞北竅下裂上懸南牖石飛架其間上牖前突

石臺憩臥甚適。下直北徑百步塘。三里越塘北。小溪自古鼎來橫涉之。又大溪自南趨北。卽赤龍巖前水。東過東梁至此。二水合而北行。一石梁橫渡。於是東西俱駢峰成峽。溪流其中。曰靈壽溪。北一里。漚爲安靈潭。神龍之所窟也。又北里餘。山當面橫列。洞門開張山半。余疑真仙巖至矣。至則路轉出其西麓。遂東行環遶其北。北復有洞。不識中貫南洞否。時望真仙巖山尙在北。北卽安靈溪水流入真仙後洞處。予初未悟。遂東循山麓出。北轉一里。與東梁大道會。峰轉溪怒。始見真仙前洞。東北高懸。溪流從中北出。前有大石梁二道。越梁而西南向入洞。洞門圓迥如半月高穹。中剜一山之半。其內

遊記

三册下
粵西二

七

水陸平分。北半高崖平敞。南半迴流中貫。由北畔陸崖入數丈。中壁橫拓分二道。壁之西有竅。南入。僧棲倚之。壁之東南溯溪岸深入。巨柱中懸。上下綴旒紛鬱。稍後則老君巍然。鬚眉皓潔。皆玉乳所幻結。故又名老君洞。其後則千門萬戶。乳像愈極繽紛。以無炬未及入。下則溪漚爲淵。前趨峽壁。激石轟雷。其隔溪東崖。南與老君對者。溪上平聳爲臺。後倚危壁。爲下層。北與僧棲對者。層閣高懸。外復疎明。爲上層。但非鵲橋不能度。遂出憩僧棲。同僧叅慧入市。隨之北。一里過下廓。又北則大江在東。卽潭江。北自懷遠大融南來者。菜邕江西自丹江橋遶老人巖。至此東入江。二水合流下廓旁。道當其

中北渡萊邕橋入融南關約二里城居寥落問老人巖道復從下廓北循萊邕江西南行西抵一峰石勢聳聳迴削千仞老人巖當北溯溪岸予悞南入山峽峽乃老人巖南支與南山夾成者南峰北麓石磴盤山而上有僧方汲趨問之其上爲獨勝巖非老人巖也巖北向高綴峰頭僧廬塞其門入其下不知爲巖也穿穴入內開一龕稍窪亦隙裂成橋但無光透耳獨勝北有鯉魚巖卽古彈子巖聞乳柱甚豐不及往仍東北出下廓溯西北小溪抵老人巖山下下有洞東向捨之西向拾級上兩崖合束懸磴其間取道甚勝已透入一隘轉北上至巖之前門其巖一洞兩門前門東南向後門東北向

遊記

三冊下
粵西二

八

石崖高跨而東突洞徹其下前後相去不遠亦穿巖類惜前後俱障以佛廬遂令空明頓失從廬側轉入後巖仰見盤空之頂後巖僧樵未返門閉不得入遂留爲後遊下山出獨勝東峰披蔓草行二里暮抵真仙巖宿

二十八日參慧東炬導遊真仙後暗洞始由天柱老君像後入溪之西崖陸洞也千柱層列衆竇競啟前之崇宏雄曠忽爲窈窕靈奧窮搜殆盡石下巨蛇橫臥火燭之不見首尾踰之出入竟伏不動然此奧雖幽邃猶溪西一隅時時由隙東瞰溪流冀得一當終未能下涉旣出迴顧溪竇內透天光對崖旁通明穴益神動不能已托參慧入市覓筏以爲必入水

洞計叅慧復執炬引予由巖前左右下北入深穴穴雖幽深無孔柱幻空然下多龍脊盤錯交伏鱗爪宛然亦一奇也出洞叅慧卽往覓舟予恐不能遽得不若躬往索之且以了老人諸勝乃出洞北大道西望山峽間峰巒聳異內有劉公巖草深無道仍從下廓先趨老人巖入下巖門東向西北竅深入漸暗聞秉炬以入徑甚遠從門左仍躋石峽抵上巖轉透後巖內結閣盡踞洞口閣前臨眺上下懸崖峭絕菜邕江西來潑其北麓自爲分合抵巖下北轉去大江當其前縹然如天表飛仙直北卽爲香山遂下山絕流渡江水淺不及膝溯江北行望其西江所從來處峰巒瑰異內有雞場洞幾隨之

遊記

三册下
粵西二

九

西遇荷薪僧指香山在東北乃轉循北山東麓一里西登級抵香山廟廟虛無人東北至縣西門又南過下廓遇樵者令覓舟人真仙二人慨然許之先是予屢覓之居人俱云此地無筏而舟爲陂阻無由入洞須數人負之趨不意此乃漫相許予心不以爲然竊計巖中有遺構可結桴浮水獨巨木不能自移還與叅慧圖之旣抵巖叅慧已歸亦覓舟不能得惟覓人結桴爲便意與予適合

二十九日晨促叅慧覓結桴者未行昨所期樵者呼羣至謂予曰已入洞否予應以待舟樵者謂舟不能至若聯木爲桴予輩水中挾之入正與舟等叅慧卽以覓人錢畀之遂羣負

木入溪斬竹爲筏頃間桴已就復以巖中大梯架其上更置木盆子踞坐盆中諸人前者引繚旁者挾篙後者肩聳遇深淵輒浮水引之遙不能引輒浮水挾之始由洞口溯流仰矚洞頂益覺穹峻兩崖石壁劈翠夾瓊漸進漸異前望天光遙遙層門複穴交映左右旣入重門兩旁俱有層竇盤空上嵌前後明光皎然彼此照耀挾桴者欲從中爇炬登崖以窮旁竅予令先溯流出後洞乃復浮水引桴抵洞門門西南向吸川飲壑溪破石而下桴抵石爲所格不能入溪捨桴踐石出洞又砦然一天也溪石坎坷不受踵望左崖有懸級在伏莽中援莽躡空上不數十步輒得蹊徑四望平疇中圍衆峰環

遊記

三册下

粵西二

十

繞卽予昔來橫道北巖之東北隅也返登桴順流入洞中扁東西俱有穴可登而西崖穴高難攀且前遊暗洞彷彿近之東崖則穴錯門紛曾未一歷遂爇炬東入其上垂乳環柱與老君坐後暗洞諸勝工力悉敵從其內穿隙透折多有旁穴星星上徹雲影知其東透山膚甚薄從其側宛轉北出已在老君對崖之下層因崖爲臺下臨溪流再出卽爲對崖之上層上亦列柱縱橫石崖峻阻與此層無徑相達仍引桴下浮欲從溪中再上溪崖亦懸嵌無由上躋計取道當從洞前南轉抵東北山椒可入洞中非架飛梁不能上也乃絕流引桴還登東崖諸人釋桴歸舊處予急呼其中一點者攜餘炬令

導遊劉公洞北半里西南轉入小岐向山峽二里抵山下
一洞在南山東向一北向北山中突峰又一洞東向方莫知適
從忽聞牧者警咳聲遙詢之北向高騫者是亟披莽從之其
人見予所攜炬一束笑謂入此洞須得數枚炬乃可竟僅此
將何從伏莽中石磴隱隱隨之躋洞門巨石前橫從石隙入
崖石上大鐫西峰之巖四字爲寶祐三年李柱高書前又有
碑記二方其一不可讀其一爲紹定元年太守劉繼祖重開
此巖桂林司理參軍饒記并書始知名洞以此入洞先燃炬
從其後右畔入乳柱環轉不數丈出又從其後左畔入數丈
後愈轉愈廓玉笋左右森羅升降曲折杳不可窮紀恐火炬

遊記

三冊下
粵西二

十一

易盡竭蹶嘗巒出不知蔗境更何如也西望北山中突洞石
態秀出門若雙列中必相通趨其下崖懸無路導者已先歸
見子徘徊留眺復至引入南麓小洞內甚淺不通上巖上巖
危嵌峰半遙望多姿今迫視了無警目處且路絕莫援不得
不爲却步及東行回首再顧紛綸之態復標異撩人仍強導
者芟翳級石猿引以登予接之遂歷其上削壁層懸雖兩崖
並列中不其貫外復淺竭徒負巧質耳興索然返東南抵真
仙巖阻雨巖中數日

七月初三日出洞往覓對崖明竅徑東越洞前石梁循山南
轉而西徑伏草中時不能見抵後山過脊竟不得西向登崖

徑乃莽然躋山半覓之。皆石崖嗟峨無竅可入。度其處似過而南。懸崖復下。忽二農過其前。詢之。果尙在北也。依所指西北上。莽棘中果有一竅。止容一身。然下墜甚深。俯瞰之深餘三丈。卽北崖僧棲對望處。已聞搗碑僧笑語聲。但崖峻下懸不能投虛墜。眺視久之。見左壁有豎隙。雖直上無容足。攀指處隙兩旁相去僅一尺五寸。可臂紉足撐下。乃左轉阿隙。轉處石皆下垂。無上岐。圓滑不受攀踐。摩腹過。旣至隙中。兩臂兩足若膠釘稍動。卽且溜脫下。然卽欲不動。支撐久力竭。勢必自溜。不若乘其勢。蹲股就之。迫溜將及地。輒猛力一撐。遂免顛頓。此法亦勢窮所生。非問學可至也。旣下巖寬四丈。中

遊記

三册下
粵西二

十二

平。下臨深溪。前列層柱若護欄。巖內四周環壁。皆紛紜威蕤。非雕鏤所能殫。前與西崖掩映。後復得洞頂。雙明竅從中遙顧。溪兩端出入處俱一望皎然。收一洞全勝。真仙爲天下第一。此又真仙第一也。巖右一石平安溪上。由其側攀崖而北。又連闢兩龕。內俱明潔。石壁迴嵌。色態交異。如初墜處。其前崖亦有一柱。傍溪起。中織圓類。指上抵洞頂。復結爲幢絡。蛟龍繞織。指下垂環。而天矯者數縷。內近龕處。復有石圓起。三尺。拍之聲若鐘。其旁倒懸之石。皆能傳響。此皆溪東上層之崖也。南與下層並峙。崖相隔無幾。中有石壁。下插溪根。無能外渡。稍內。有隙南入。皆倒垂龍形。縱橫交折。冀其中通南崖。

尙有片石隔若鑿空取道於此從下層臺畔結浮橋渡老君
座後宛轉中通無假道於外免投空嶮真濟勝快事也時雖
溜下計上躋無援隔溪呼僧樓中揚碑者乞其授索垂崖庶
可挽之上揚者不識外轉道欲以長梯涉溪溪既難越梯長
不及崖之半卽越溪亦不能下徬徨久之擬候叅慧歸覓道
授索因午過猶未飯反覆環眺其下豎隙雖無可攀援其側
覆崖反有凹孔但上瞰不得見下可因躋聳身從之如鳥斯
翼不覺透井出仍從莽中下山返飯真仙巖而臥

初四日聞西南十里古鼎山有龍巖高懸鐵旗新闢且可從
真仙後溯靈壽上流幾欲命展爲候揚所羈

遊記

三冊下
粵西二

十三

初六日揚事竣始探鐵旗巖晨餐卽行過來時橫列之北洞
及南洞南過安靈潭西渡溪從峻西向山坳半里踰坳路漸
大透山峽出共一里南越小橋卽來時橫涉小溪上源也橋
南山半洞北向無奇循麓西至古鼎邨問鐵旗巖居人指西
北峰半半里抵峰之東南又西始見洞懸山半閣倚於前稍
上得層級大木橫偃級上叢木耳芝結其下子時急入巖
木及細簡抵巖巖南向正與百步塘南山相對內亦無奇外
勝頗饒鐵旗名以峰著非以洞著也因問僧龍巖所在僧初
住山誤以沸水巖爲龍巖指子西南入龍巖實在東南古鼎
邨後山子不知從僧半里至沸水巖下穴東北向滿漚水內

聲磁峒東穴亦如之。蓋其下皆中空故也。予所聞龍巖在山半，乃望高上躋。上岐兩峰中，削干仞，東西各有淺穴，側鑿終無危巖注水，乃下。東至古鼎邨，邨後山南向開洞，一高峽上穹，一圓竅並峙，卽從岐東上，皆無峽中之水。如所云龍巖者，旣下，仍由邨北舊路，過小橋，溪挾雨瀑漲，橋沒水底二尺，杖傘以渡，念小溪如此，若靈壽石堰，漲高勢湧，必難東渡。適土人取笋歸，古鼎問之，曰：大溪誠難涉，可不必涉。踰嶺抵溪，卽隨溪北下，止涉一小溪，竟繞出老君洞左矣。予聞之喜甚，踰坳抵向所云安靈西堰，果水勢洶湧，非搗厲所能及。卽隨溪左北行，約里半，近隔溪橫列之南洞，溪遂西轉，又還西面一

遊記

三冊下
粵西二

古

獨峰從其西麓轉北，東向趨老君後洞。靈壽大溪已東去，惟西山夾中有小溪西來注之，上有堰可涉，循溪而東，從左越坳下，坳皆懸石層嵌，藤刺冒之，不覺陷身，沉頂手足失勢，傾蕩洪濤中，汨汨終無出理，久之竟出坳脊，俯攀棘滾崖，出洞左，蔬畦得達，洞叅慧已下，櫬支扉矣。呼啟者再得入洞，若更生焉。

初七日別叅慧入城訊舟。

初九日始得一小舟，過午，主舟者至，發舟東南行，已轉西南，共六十里，泊沙弓。

初十日四十里，爲羅巖邨。巖在江右，層沓斑駁，五色燦列，南崖稍低，石芝堰峰頂崖半，匏剗一洞，當有勝可尋，惜來時以

暑雨掩蓬，今去僅隔江遙睇耳。又四十里，柳城縣，縣南二里江之東爲蠻獮山，削崖截江爲縣城南障，西卽峭峰叢立，土人指爲筆架穿山者。棹月順流，瞬息二十里，一山兀聳江東岸，排列而南，江亦隨之南折，灘聲轟轟如殷雷，爲倒催灘。又南四十里，抵柳州府，泊南門，城鼓猶初下也。

十一日早入寓，靜聞未瘥，顧僕亦病，往返二十日，冀其霍然同行，加以顧僕尪弱，尤甚爲之悵悵。

十三日出城南渡江，循馬鞍山北麓西行，折而南，循其西麓由西南塢中登山，草沒石級，溼滑不能投足，仙奕巖在山半，削崖下門西向，正與立魚對，祇隔山下平壑中一潭，巖內逼

遊記

三册下
粵西二

十五

如合掌，深止丈餘，巖右有石端聳，上迸裂成紋，參差不齊，雖可登憩，以爲黑肌赤脉，分十八道可奕，似未確。崖左東南上，又裂一巖，形與仙奕等，西南向，其下東南抵坳中，又迸一巖，亦淺隘不足觀，仙奕三巖齊列山半，俱相伯仲而已。西下山麓，還望復得一巖，亦西向，正在中巖下，巖前砥石如枰，其北石窟成峽，北透通明，中開朗可憩，出巖西盤一山，嘴轉出東南，山半有洞，西南向，登之洞門呀然，中高穹上出，下深墜，縱橫成峽，樓殿層疊，雖不甚寬放，固以危峻逼裂見奇。入門有石突門，右青踞若牛背，復高突一石，圓若老人首，先是立魚僧指其處有壽星巖，必卽此。由突石左懸級下墜，西出突石。

下則下墮淵削上級虛懸皆峭裂不通行東入峽道中灣環以進忽天光上映仰睇若重樓空架兩崖上覆下嵌無由渡虛上躋遙見光映處內門規列高懸夾崖末外戶分透前山頂平若覆帷恨不牽縷一登下山東仰北山半復有門南向計其處當卽前洞光映所通也下俱迴崖層亘稍東循崖西北上踰下崖抵中崖上崖卒懸絕不得上復從前道下更東循崖角西北登上崖沿崖西陟則洞前三面皆危壁倚空惟此一線盤崖可達前有平石如露臺內旋室方丈四壁俱環柱駢枝分布密嵌西北內通一門下臨深峽果卽前所仰望透空處也仍循崖端東南下南復有山鵲起從西麓仰睇山

遊記

三冊下
粵西二

十六

半懸崖穹拓黃斑赭影欲登無路循山南行得微徑從草中東上抵一門外雖穹然內僅如合掌無可深入望黃赭削立處已在其北崖嘴間隔不可盤陟復下至山麓再從莽中望崖登久之抵崖下崖危削數千尺上覆下嵌若垂空之雲亘接天半每當平削處裂孔一方中多紛綸奇詭第瓊隘不能深入循崖脚北行上有飛突之崖升降石罅中如度凌虛檻榭披覽久之下山東出前峽踰界峽石垣又東兩崖石皆巉嵌叢翠倚之其一里出馬鞍東麓得北來道截大道東一里爲郡東門對江渡於是瀕江南岸倚屏風山北麓東行里許抵登臺山江爲山扼轉北去路從山南繞麓而北一里有

山橫列三峰其陰卽王氏山房所倚余昔來自維容從其北麓渡江者也山南有洞駢立南向呀然其山倒石虛懸內裂三峽通外三門宛轉迴合惜不甚深擴西峰之陽復有一巖南向皆赭赤之石中甚淺遂下西坡小徑北循西麓踰一岡竹塢蓊叢共一里於是東倚山麓西臨江坡坡上密箐蔽空連麓交映道出其下行空翠中一里抵姚埠東門渡由郵後南向登山入竹塢中篔簹萬箇俱碧玉森翔塵喧開滌頓盡已而上山石磴甚峻西南折穿榕樹根中又東上過一皮石片下石去地五六尺崖旁平度出薄齊架板上爲王氏山房小樓三楹橫洞前北臨絕壑勝瞻遐眺樓後卽洞洞高不受

遊記

三冊下

粵西二

十七

樓掩日東林洞洞後分東西竅南入西竅稍東轉黑隘不堪進東竅亦從南入轉東忽明踰東闕出巨石迸裂成兩罅北透者石叢而平臺中懸其東下隙則茅閣虛嵌削崖四旁聳石成雲非若他山透腹出一覽竭致也從洞東南躋嶺頂石磴危峻收望愈擴直南盡登臺久之下山渡舟適至由東門二里返寓

十七日同靜聞輩下潯州船以中元節無旅客故留滯數日十八日晨餐後放舟十里有小山在江左江稍東北曲小山東爲龍船山又西南爲夾道雙山乃北門陸路所出也又五里爲油閘江始東轉十五里乃轉而南南十里爲山門冲卽

向日維容來渡江處江東爲南寨山西麓石崖迴返下嵌江流又南十里爲羅峒前有山兀突坪中罅裂其南上連下透如石門巔又一圓石突綴作一僧倚崖南向肩與崖齊頭顱上出又五里諸峰森叢江右由山門冲至此江稍西南轉又東五里轉而南一崖懸突江左層累叠嵌光采離奇更有尖峰若牛角遂東轉五里迴渚成涯曰犁冲山脉北自牛角尖直下江流環其東南西三面中成盤涯宛似犁尖云忽北轉五里直抵牛角山下復轉東去灘聲如轟雷久之乃止懸流迴湍一瀉數里曰橫旋灘自犁冲北轉至此若破壁出東南下灘五里山漸開又東北二十五里至三江口洛青江自東北來注日已西遂泊

遊記

三冊下
粵西二

十八

十九日乘月放舟五鼓抵賓江有巖特立江左下削上突江因之西轉二十里至象州城在江東岸隔江卽爲象山西二十里過大容堡遂西南行兩岸始廓然無山又東南十五里都泥江白西南來會江東北岸一小山北面分聳西岐爲元突東峰峭削尤甚正對都泥江入江口特建標以識都泥江者北盤之水發源楊林海子抵普安州由泗城下遷江歷賓州來賓出於此溯流舟至遷江止上流卽土司蠻峒人不敢入水多懸流穿穴故鮮核其源流也又按慶遠忻城有烏泥江由縣北合龍江詢之士人咸謂忻城絕無北合龍江水口

蓋卽都泥南下遷江者且遷江忻城南北接壤烏泥都泥音聲相亂實無二水也又東南二十五里東下大灘曰菱角灘又二十里泊瀧邨

二十日放舟五里下大鷺灘江右石峰復駢列出又南五里至武宣縣隔江西岸山卓立岐分引隊南下巖皆奇詭若垂首引項偃僂比肩種種怪異志謂縣西有仙人山南有仙巖山當卽所望諸異峰也東南十里兩岸復擴然又二十五里爲勒馬堡過此卽潯郡桂平界南十里兩岸山漸合又五里爲橫石磯石自江右山麓橫突江中返流倒湧遂極湏洞勢兩崖連山逼束至此爲入峽始又東南二十五里爲鎮峽堡

遊記 三冊下
粵西二

十九

又十里兩岸山勢益高聳獨冠諸峰間出石峰懸峙江至是轉而東其南廻東轉處江左瞰流之石有大書鐫石傳爲韓督憲留題云東北二十里小溪自北破壁出其內峻崖屈曲如夾堵墻又東卽大藤渡峽處南北兩岸俱有石竅立江心昔有巨藤橫架江上故南北兩山猶賊此追彼竄得藉爲津衢韓公雍破賊斷之因名斷藤峽過斷藤五里下弩灘遂南出峽口一水自東來注曰小江口合而西南下勢甚峻急蓋北自橫石磯入峽南出弩灘其中山勢廻逼正如道州瀧江嚴州七里瀧但此峽相去六十里始入爲東西峽中轉爲南北絕無居廬叢木虧蔽兩旁悉猺獠窟宅故得因勢展暴使

刊木開道則亦丹崖釣臺勝概相麗矣出峽西南循山下十五里抵潯州府日已暮泊於北門

二十二日留靜聞顧僕寓潯之南門覓擔夫爲白石勾漏都嶠三山遊從驛前南渡鬱江八里至車路江小水自東南西北入鬱郡舟上水可抵此又南二里爲石橋邨南望白石山與獨秀山各挺峙三十里外實尙六十里而遙爲山道迂複也邨南二里得廻石一壑清流中瀦石皆玲瓏迸裂爲蕪原生采更南滙潭益盛東有山自南抵北從其西漸升而南益迸穴平地下陷爲峽爲井中悉叢石合嵌淵水澄其下葢地中二丈下皆伏流潛通石骨阻且偶骨裂土迸則石出陷成

遊記

三冊下
粵西二

二十

穴云又南二十七里抵姚邨依山滙水真山中樂墅也渡小溪南踰嶺五里爲木角邨邨在白石山北麓去山尙十里於宿山邨春舍間

二十三日東南越嶺岐徑望白石趨其山峰巒崖絕東北特聳一峰爲獨秀孤懸峭削上齊白石頂下則若傍若離直剖其根崖石獨多赭赤色五里路漸沒草間嶺半得一山家傍舍植芭蕉甚盛趨問白石道尙在西南由其左登山東向上南轉山脊五里度坳稍東卽南折直抵山北麓獨秀已不可見惟危崖盤削下多平突之石盤亘疊出又作一態直上抵崖石下南出其一里爲三清巖巖西向橫開大穴濶十餘丈

高二丈深及濶之半石特平燥不作紛紜滴瀝勢卽白石下洞也又南半里爲大寺後倚崖壁寺左水自半崖下滴日圓珠池池無他異按志山北有漱玉泉西事洵百粵風土記俱謂其泉暮間寺中鐘鼓輒沸溢起止則寂然詫爲異及抵白石寺并漱玉名不知何况聞鐘聲沸非寺僧之蠢卽著書附會之談也遂由池前南循崖壁行已東上入石峽峽兩峰中剖上摩層霄裂罅相距不及丈磴懸其中時有巨石當關輒置梯以度連躋六梯始踰峽登坳坳南北猶重崖摩夾稍北轉循坳左行則虬木叢篁迷雲暗鳥身度霄漢上不知午日之中東嶂稍開始見獨秀峰東北立東南塢中又起一峰正

遊記

三冊下

粵西二

二十一

與獨秀對峙高殺三之一宛然蓮蓋中擎但四面爲諸峰所掩惟此得觀全體耳又北攀懸崖上木根絡石間爲梯爲繩得受手足緣躡已轉一整礪自山頂西向墜峽纒搗潭穴峽南復懸梯上登宛轉三梯東行平岡間外則萬仞下削內卽絕頂漱根之峽內外皆長松一道深碧間日影下墮風烟縈漾閃映萬端林盡鑿石成磴躋磴轉會仙巖呀然南向矣巖皆黃赤石上下開穿內漸湊合無紛紜滴瀝與三清同而地位高迥已窮極幽暢乃從巖右躡削崖凌絕頂崖雖危削盤阻處中有子石鸞卵大嵌突齒齒上露其半藉爲麗趾級不覺一里已踰出峰頭東向與獨秀對揖此峰正從潯郡來所

望獨秀西白石絕頂獨秀四削如天柱非傅翰不能翔上此峰三面亦危崖特立惟南面開鑿梯隙得躋頗似大華三峰上分仙掌下懸尺峽透險躡虛此真青柯嫡冢也未見其比卽桂朔柳融諸峰非不干雲直上然石質青幻片片芙蓉攢合竅受躡痕受攀無難升陟此則一劈萬仞雖曲循隙窅何啻踏空自奮也獨秀蓮蕊二峰爲此峰門戶其內環壑深塹虧蔽日月重岡間之人無至者久之下會仙歷三梯三里至峽切之上峽南一石倚崖起下有線罅穿其中僅容側身進其上或連或缺旣而漸下南轉出罅飛石上下懸嵌危不可躋返出石夾切倚石側復有道上出石端危懸殊甚攀根引

遊記

三冊下
粵西二

二十一

蔓僅躋其端透入石闕中卽倚石西盡處與前崖夾成闕穿出闕南抵飛石南懸之上瞰前罅正在其下遂攀登倚石頂則一臺中懸四崖環峙上又連者如橋缺者可瞰如井下峽切歷六梯一里西出峽又一里北返寺

二十四日西向下山三里過周塘邨倚山環池樹木掩映南七里爲麻峒墟又二十五里宿中都峽

二十五日南二十里下核桃嶺大溪自南來西折去卽潯郡西繡江上流也發源自平山墟乃大容山西北水大容東西有兩繡江一南自廣東高州北至北流縣合大容東南水經大縣注於潯此容縣繡江也一卽此水爲潯上流之繡江循

溪三里涉流渡江水及腹爲橫塘渡潯郡南界止此江南卽
鬱林地屬梧州西北境由江南岸溯流踰嶺南五里過白堤
亦深山與境溯溪右南行八里得大寨邨自白堤至此山廻
谷轉夾塢成塘溪木連雲堤篁夾翠宛然避秦處也

二十六日西南十五里過箬帽山山稍開南見大容又五里
爲平山邨東望大容在三十里外猶有層峰間之南十里轉
峽西出爲勒菜口於是山分兩界大容東北峙寒山雄倚西
南排闥東南去中成大塢溪流南注爲羅望江源十里過馮
羅廟廟南峽愈開寒山南盡而大容東轉於是平疇擴望南
有岐東涉羅望江循大容南麓過陸馬廟東四十里可出北

遊記

三冊下
粵西二

二十三

流縣予取鬱林道南十里止松城墟

二十七日十里抵鬱林州州西南一里南流江自東而西其
流較羅望爲大涯下泊舟鱗次上有堤內環爲塘堤下臥石
片片橫列涯間紫泉在堤下石片中石南北夾成橫罅橫三
尺闊二尺東廻環而西缺其南水從底上溢瀦其中停泓者
三尺上從南缺處流瀉去時見珠泡浮出水面泉之西有石
梁曰南橋跨南流江橋北文昌閣當江流環轉中虛敞可眺
爲此中勝覽橋南爲廉州大道予由岐溯江岸東行水月巖
道也東北共二十三里踰山峽東下峽東石峰森森自北而
南出峽循西土山東麓而北一邨倚山東向又北一里半東

轉得龍塘邨邨踞岡脊中其南水南流東去其北水北入水月洞由其東又北一里半直東抵石山中峰度石橋而北則上巖西向高穹山半上巖者水月洞南倚山憑虛之竅也石山自東北來南引而下一支中出者西瞰平蕪削崖懸竇層結皆不甚深而此層最下亦極擴環峰石皆青潤獨裂巖處色變赭赤石質尤窮極神詭尋丈之間穴穿蓋偃無不具足巖前架廬當門敞其上不使掩巖勝由巖右腋穿竅上復出一層如偏閣其左腋可環柱出柱側緣崖上躋轉出巖末復得巖西向自分左右兩重左重在下垂柱裂竅仰睇上卽右重也然歷磴無階由外北躋始入右重閣綴絕壁與左層翼

遊記

三冊下
粵西二

對增妍皆巖之中層也其上削崖絕頂尙虛懸一重級絕攀躋惟供矯首耳水月洞在上巖北地稍下龍塘水經石橋北過上巖乃東向搗入水月洞洞門亦西向路由其南水行路北相沿入水北透後洞出前後洞門一望通明水旁蹲石夾流兀突俱作獅象形洞頂垂石天矯交龍舞螭繽紛不一其水平流洞中無真仙巖之大兩崖亦無其深峭可褰裳涉溪崖右有一小水南自支洞出爲陰洞左則沿溪笋乳迴夾上亦裂門綴穴層閣之上又滙水一池爲奇此明洞以內勝也後門崖口列大柱數條自門頂合并倒懸洞內望之蜿蜒浮動此明洞以外勝也陰洞乃明洞窟穴中又分水陸流不甚

大東南自牛隴又開一門穿山腹至此合明洞溯流南入半
里洞漸沉黑崖益斗水益深結筏積炬曲屈約二里出牛隴
此陰洞水中勝也從陰洞溯流始崖左嵌石下竇甚隘匍匐
下穿引炬而前忽巋然上穹上下垂聳盤柱詭狀百出升降
其中洞心駭目遂曲莫盡此陰洞陸中勝也是日子抵上巖
已過午道流方扃戶出予坐崖下荔陰間久之道流罷釣歸
卽促其束炬爲水月遊旣入明洞篝火入陰洞道人不隨支
流入由其側伏窪穿隙逼收陰洞陸崖勝中崇宏幽奧森羅
衆詭凡五易炬出欲溯流窮水崖道人以無筏辭請別由牛
隴探其後崖不必從中出也乃出明洞涉水窮左崖之勝仰

遊記 三冊下
粵西二

三十五

睇後洞諸垂虬舞龍石出飯上巖宿

二十八日子曳杖窮最上巖下憩右竅偏閣中旣午循山而
南至昨來所渡石橋橋側東折入峽中是山石峰三支俱鋒
稜巉削由東北走西南中支爲水月巖所托是峽則中支南
支相夾者南支多削崖裂竅予來時循其西麓詢之土人皆
曰中不甚深今故從峽中轉其北得平窪一圍羣牛散寄其
中知爲牛隴窮隴西北水滙成潭陰洞後門卽東南臨潭上
四旁皆陡石無路入必涉潭乃登洞甚虛敞隨水西入漸北
轉石崖成峽水亦漸深昧與水月陰洞所見等雖未徹其中
兩端源流悉見可無煩暗中摸索也洞門右崖馬蹄痕莫紀

其數疑卽志所載天馬洞出洞益遵峽而北東西兩界峰石
翔聳蔚成霞綺二支北盡處北支又兀突起與中支北麓對
峙成峽下有三洞南向。上蒸雲流電閃爍陸離東畔二門駢
列雖懸乳續紛俱不邃進其西畔一門孤懸峰半洞門嵌空
中忽淵墜深且數十丈宛轉內透極杳渺之勢但兩崖直削
無級下降踞崖未望之飛鼠千百成羣見人蓬蓬內窺聲傳
遙谷出洞望中支西北山嘴頗近以爲由此穿水月後洞抵
上巖甚便趨一里至其下攀陟山岡則巨石飛聳中都蔓絡
脚嵌沉淵底遙探洞外諸奇石杳不可見卽溪流破壑出者
亦盡沒其跡乃仍出向峽返上巖復至水月後洞睇望所陟

遊記

三册下
粵西二

二十六

路斷處尙隔一峰嘴也

二十九日由上巖過牛隴其三里出峽有兩岐直北循北支
石峰東麓者爲北流大道東向踰嶺者爲間道乃從東岐二
里抵塘岸墟墟爲陸川北境北轉卽北流屬二十里爲橫林
邨北石山一支自北而南叢簇尖翠予初望之以爲勾漏在
是漸近路出其東南西望而行秀色飛映蓋此山在北流西
十里勾漏尙在北流東十里也自橫林其東北十里抵北流
縣縣當大容南面之中山脈由大容南下曰綠藍山水分東
西流東流者爲北溪循城東下登龍橋入繡江西流者卽南
流江源西南合水月洞水經鬱林南門西合羅望定川諸水

南下廉州入海是縣實爲南流源其曰北流者以繡江東自
粵東高州來至此始勝巨舟東過容縣界合洛桑渡水經容
邑南門下藤縣北入鬱江去非謂北流源此也縣西十里爲
鬼門關東十里爲勾漏山二石山分支聳秀東西對列而鬼
門顛崖邃谷兩峰合立路經其中勝與勾漏實相伯仲予自
橫林北望卽奇之不知爲鬼門也至縣始悟已從東南越之
過以不及經其下爲恨出縣東門飯於沙街北出隘門抵北
山下循南麓東行五里度溪橋入石山夾中南爲望夫石卽
黃婆巖西垂山也北則石峰透迤愈東石骨益瘦疑卽獨秀
巖所托今已失其迹峰東崖大書勾漏洞三字此南北二石

遊記

三册下
粵西二

二十七

峰俱東拱寶圭洞予東行夾中凡五里石山迴合中復突一
峰勾漏菴正倚峰南麓其西隅卽寶圭洞菴頗整潔內堂三
楹西則葛令也葛像綸巾朱履飄然欲生前庭佛桑盛放乃
令道人多覓竹束炬爲明晨遊具道人欣然願前驅

八月初一日先作寶圭行約道人肩炬篝火後至洞在菴北
半里菴後先有兩巖一南向一西向望之俱淺寶圭更在其
北漫流自西北來東向直漱山足北涉之登山抵洞門門西
向左開巖軒敞平臨西峰右則深入窪嵌下一石柱當門端
石斜飛磴道由其側下至洞底交關爲四岐由東入由南入
者二岐俱深黑岐而虛明則一西向豁一北透焉西向豁者

卽正門所由入內與東岐黑穴對北透者偏門另啟正對南岐黑穴也岐交於中成十字東岐之南頂側忽倒垂一葉平度半空外與當門柱適對上下憑虛各數十丈卷舒懸綴薄齊蟬翅葉間復分開竅竇若眼之決背由東岐南崖攀級上抵葉根垂蒂處盤旋蒂側出葉間踞孔坐其上坐久之復盤蒂下向北透岐岐中一乳倒垂長數丈水由其端涓涓下更北入峽中右則窪而北出爲下門左復稍高北度疊成上閣閣前平臨西北亦有乳柱界其中此明洞西北二岐也道人負炬至熱火先入南室兩旁壁峽起高而不廣入半里側皆裂竅垂柱少進忽下墜成淵由洞抵水深二丈水之深不知

遊記

三册下
粵西二

二十八

其幾也兩崖俱無可着足南眺其內窅黑莫竟促道人涉淵言水深曾無徒涉者促之覓筏則又云隘逼曾無以筏進者然則若何可入曰冬月水涸始可墜崖涉入何如曰內甚深能見明而不能升也予聞之悵甚捫石投水中淵淵不遽及底旁燭之仰見左壁有旁通隙入則漸束無餘竅乃下返出四達處更入東穴初兩旁亦成峽壁下漸高中闕如堂皇稍北而東徑遂窮比之南竅雖有穴宛轉深不及其半乃謀爲白砂洞遊道人復肩炬束火從北透偏門下層出循山西北麓行始見其山前後兩峰駢立而中連峰西南突者卽寶圭東北峙者乃白砂所伏白砂亦前後開洞前洞北向高敞分

爲三門兩旁峻懸中可俯級入後洞南向高隘僅通一線前對寶圭背東卽二峰中連脊也先經白砂後洞草沒無徑道人不可入北去一里東北轉繞山北麓南躋前洞入門卽窪下數十級及底仰視門左右各有隙高懸卽所謂左右門也逆光流影豐照四徹然虛嵌莫得攀其處從洞中東轉頗崇宏漸窮漸黑予遍探四面無深入路出促炬命導仍入其中以火四面燭旁無路也導者忽從南壁下投炬蛇伏入竇高不踰尺廣如之旣入忽廓然盤空衆象羅列方瞻接不暇而崇宏四際復旁無餘隙透東轉南條開條合凡經四竇皆隘若束管薄僅透屏故極隘忘窘屢經不厭其煩也旣而東崖

遊記

三册下
粵西二

二十九

之上大書丹砂二字南有岐入之不深出向西轉再南則天光四射後洞門在望矣導者欲仍從前洞返予強之出後洞見寶圭後峰特爲當門屏乃西南披草棘出均仍過寶圭北偏門將及菴東探清泉巖卽前所經南向巖也還飯菴中下午探近山諸勝西南入黃婆巖黃婆巖者寶圭西南諸峰所裂巖也其山西自望夫石東來巖當其東北隅與寶圭東西對稍南遜巖門外極危聳黃崖綴其中巖頂峰石分岐發異惜內無深入窾西抵望夫山西麓環觀東西南三面鼎立諸峰巒岫無出黃婆一面者按其攢簇之勢疑卽志所載巫山寨云已乃循黃婆東麓南抵東南隅石愕懸峭片片飛雲綴

空自外崖攀峭石上。歷豎隙屢出層空。達峰頂。遂盡發其角。嵌態下山。轉循南麓。峭崖穹立。石色雄赭。乃東由營房橫過。勾漏菴後峰東南角。蓋寶圭所托之峰。南面駢立。而中連。西立一峰。卽菴後清泉巖所倚。東立者。與之比肩。南向。循峰東麓。北行路左。得一東向巖。內頗深。漸縮如牛角。出洞。又北。清流一方。淙淙自亂石中出。上皆草石。蒙茸莫辨。其自來。忽一少年至。曰。欲覓洞乎。其上翳草中。二洞相距數十丈。可探入也。予亟攀棘踐刺。覓之。深蔓中。洞門果穹然。東向外。爲蔓石擁蔽。入洞。卽隕然下墜。俯瞰之。有溪自南而北。貫其底。崖勢峻立。非攀緣可下。四矚其上。南崖有墜而未盡者。片石懸空。

遊記

三册下
粵西二

三十

若棧道架壁。闊不盈咫。而長竟墜處。直達西崖。但中棧有二柱駢立。若樹柵斷路。外一柱已爲人截去。下存尺許。可跨而過。但其處益狹。必以兩手握內柱。外柱始得越。臨深蹈險。莫此爲甚。過棧達西崖。與洞門正隔溪相向。乃明炬燭之。崖之下。深墜與外崖等。上則垂列乳柱。迺錯開闔。踈樞窈窕。深入猶徹外洞光。乃出崖臨溪。從深墜處投空下。抵溪中。仰視洞頂。高穹延照。內映側棧。凌虛尤增飄渺。溪水深不及膝。南從崖脚湧出。北墜崖去。卽由此東出。爲亂石泉源也。於是從南崖溯流入。穴極低。垂覆水面。距止尺。遂衝沫過。穎南入數丈。望前有流光熠熠。又南數丈。洞復穹然。高盤轉而東西橫貫。

上則東闢爲外門，門高聳，與前所入門等勢。時從人亦至，乃令其以炬更前，西向溯流，洞愈宏放，流益深闊，又數丈，石砥中流，登石內望，洞闢如廣廈，淵潭四際，其下以杖測水，不竟其底，不知更幾轉，得抵寶圭南穴前，所望深墜處也。返步隨流，仍抵東闢外門下，從人將垂首及膝，腰橫炬，匍匐北向，低穴出，予止之曰：此門雖峻，與先所入者無異，不若攀空躋危，竟登此門爲便。遂攀崖出洞口，門亦東向，與所入門比肩，特翳於突石，連蔓遂相顧不見。洞外循左崖平出，返眺門頂，又上闢一重，惜無躋級，蓋北洞奧室內羅，此洞外綴層樓，所異者此耳。遂一以北洞上登法而下，崖半石隙，蔓影中彷彿并一里，入勾漏菴。

初二日錄詩寶圭者竟曰

初三日飯勾漏，卽東北行，由營房轉山之東南角，過亂石透泉處，徑草坡五里，越坡一塘，匯水環浸山谷，度橋約二里，堰塘愈大，石峰至此東盡，山北隙中露大容，蜿蜒爲列屏。又東十里，水自西北大容來，東南入繡江，爲容鬱分界。曰洛桑渡，水頗急，以藤橫跨西崖上，繫船於藤，渡者引藤就進，謝絕篙楫。又東二十五里，爲景清新橋，則大容東峰巍然北臨，若負展。又五里，入容縣，出城南門，門外繡江自西而東，西南合渭。

遊記

三冊下
粵西二

三十一

龍江北出藤涓龍源出天塘山北向石寨邨始入繡江渡江
南十里宿古樓邨

初四日西南循大道盤都嶠而過蓋都嶠北俱削崖懸亘無
級可階必繞出其南始可北向以登其五里過石寨邨又一
里抵石嘴鋪鋪東南八里有黃土巖不及登東度一橋始從
岐北向上山循池東上五里抵南山寺古稱靈景寺大巖倚
東崖門西向外欄高垣設蓮座於中雖云寺實巖也蓋都嶠
北穹高頂南分兩腋如垂臂直下下兜成塢清塘一方當其
中兩腋石崖皆重疊廻亘一巖甫斷復開一巖層穴之巔復
環層穴外列多門如絳帷紫幄紛披競綴靈景爲東腋首巖

遊記

三册下
粵西二

三十三

最高而大高三丈五尺深五丈橫闊十餘丈兩端稍低中穹
如半月北有三巖皆西向差小三清則當分股兜合處巖高
深橫闊同靈景東有南向二室與西向巖易隅齊列其西有
飛巖則南轉東向爲西腋戶迤邐南下與靈景分門對峙若
兩廡此下層也三清上又列重門爲中層無緣陟道其上又
啟一巖爲上層是名寶蓋巖高十五尺深二丈闊五六丈後
倚峰頂地愈高上獨當中幹平臨兩腋巔再上卽中盤頂上
午先抵靈景門外竹光旁映巖中霞幄高張心樂其幽曠僧
留午餐聞三清觀道者已他出竟止寺中

初五日由巖右北行歷西向三巖盤磴上入南向二巖共里

半然後抵三清巖巖孤境寂樹拂空明又西歷東向虛巖乃仍返西向三巖間取道北上又一里半沿躡崖末抵寶蓋巖下視中巖嵌入足底而下巖三清樹杪若浮空載之者巖左循崖躋石石廻亘如盤髻上突俱不中空雖峭削無容趾級而子石嵌崖一同白石絕頂可緣之上上一里遂凌頂乃知是山東西駢列惟三峰最高皆北聳南俯此其最西者也廻眺最東層疊更多但不及此峻耳北又橫突一峰爲此峰北護卽縣南望之趨者其北面峭削特甚西則旁插一峰頗尖銳爲此峰附西北兩附間下開一門內環爲峽乃北護山與西高峰夾而成者峽中又突嶂中盤爲當門屏由屏東進峽

遊記

三冊下
粵西二

三十三

南轉則東西二高峰交夾隙也廻合甚深曲乃從舊道下至靈景巖飯石嘴鋪北過石寨邨東望峽門窈窕聞其內山半有竹簡巖遂東向峽門入一里抵當門屏下其南面裂垂罅削爲三崖西則下屬北護峰與之並起東面危崖獨展與西高峰麓相對成峽峽南堰水爲塘環滙南罅三崖下西附小峰卽椎立於南塘上一家結茅居之環戶以竹致幽甚由此渡峽東上西峰北麓一里越嶺少下下又成峽細流南向直墜椎立小峰腋溯流北入澗壁萋森藤竹蔭其上菖蒲覆石嵌水根葉交加足之所投知菖蒲不知爲石也緣澗上東南躋嶺共一里飛石二丈當道懸梯入則竹簡巖在其北兩巖

並列門俱西北向高爽殊快南有飛泉外墜巖下崖直達澗底計巖後卽西高峰絕頂當與三清巖胸背值若由此置磴可先登峰頂次第下諸巖也返至環塘西探南面裂罅罅相距五尺兩罅並起界崖爲三俱危懸絕峭仍東抵危崖獨展處循崖北行夾澗藤樹密冒深綠空濛徑西飛巖千尺矗影流空隔絕天地若不有此行止謂都嶠南北峭秀可一覽罄幾失此幽邃凡二里危崖北窮與塢西轉卽當門屏北麓也較南麓三裂崖稍遜其峻亦環亘成塢焉路乃捨塢東向復登嶺嶺乃西高東北支北走屬北護峰者踰嶺復開南北塢塢東乃中高盤亘上亦有巖懸綴下與西高夾爲此塢北更

遊記

三册下
粵西二

三十四

有重崖間之南則灣環以出不知所極旣而南見兩三家倚西峰北麓居則石背邨也時日已下逼抵縣尙二十里亟返出石寨邨北過古樓邨昏黑中抵繡江南涯叩昨來炊飯家宿

初六日出容縣北門卽西行已復北轉循大容東麓十里水自西北來東入繡三渡溪循溪溯流行夾谷間五里爲石頭鋪復亂流涉水山勢愈夾西折入山峽行透峽共五里山復開爲李邨度一橋更入幽阻盤折山峽間樹蔓壑底溪流藤箐沉翳舉首不見天日五里躋嶺復盤折其上峽又五里山迴谷轉瀦水滿腹浸山脚皆平溢不流左右幌漾真山棲佳

勝處南出峽。水遂西流爲水源。蓋大容北下脉所盤夾成者。西北二里至同山墟。山乃大開。西轉仍見大容西峰。巍然頽出也。又五里止雞黍山北塢。秦窰岫地多大竹。裂竹片大至尺許。

初七日西北七里踰長嶺。始北望白石山在重峰外。又八里爲平地墟。西羅江自南東北注。源出大容西北。至此始勝舟。東兩日程出頭家寨。下繡江云。又十五里抵羅秀北三里。將至盧塘。道旁空樹一圓。出地一尺五寸。圍大五尺。中貯水一泓。水面上不盈圍者五六寸。下浮出平地幾及尺。澄碧涵瑩。杖抵之。深不可測。珠泡沸沸上發。屢斟出之。輒齊舊痕。不與地平。尤爲可異。又二十里渡大水河。抵陳邨。

遊記 三冊下
粵西二

三五

初八日西北八里上一嶺。正西瞻獨秀。下山二里爲陳冲。已出獨秀東北。正子昔登白石頂。東望深塢中聚落也。又三十里至陳坊墟宿。

初九日西十里渡鬱江。返潯郡寓中。兩病人比柳州時少。有起色。橫州船以明晨早發。遂攜囊下舟候。

初十日未明發舟。曉霞映江。從蓬底窺之。如行紫絲步障中。三十里望白石山。亭亭峙東南。甚迫。西北三十里。泔鎮門。十一日二十里爲白沙。又五里登涯。向羅叢巖。東北里許。北望數峰叢平疇。中南一小峰如立。搗中三四峰東西駢立。再

北一石峰稍低而橫亘，卽羅叢所倚也。由小徑四里，透小石峰峽，又三里，北抵羅叢巖門，南向，索炬同導者入洞頂高處，盤窩成蓋，又倒石捲空上垂，但無登處。北入五六丈，遂分東西內外洞，西外洞亦南向，擴然透明五六丈，由西竇北入，則西內洞矣。其內時夾時開，時高盤時垂下，覆頂平若幙，裂隙成紋，至石形之異，有盞蓮綴空，挺笋特立者。隨處布置，不專以乳柱見奇也。計里許，北過一隘，西轉有峽，北透天光，時數炬更盡，不復能由內洞返。北躋後洞出，穴北向，僅中匍匐出洞。已下北麓，循麓東行，過東北隅，導者指其上列竇曰：此東洞後穴也。予卽欲從之入，導者曰：無炬，須仍由前洞攜炬出。

遊記

三冊下
粵西二

三十六

從之，環其東麓，麓東一峰圓峙，高踰此山，竅穴離披，導者謂都無深入竇，然其北有石一枝，離立起，不由此不得睹也。復入東前洞，縛炬內遊，乳石奇變，與西內洞等，而深止得半。不若西屢轉愈擴也。東崖上穴駢連，亟躋上，則有門三穴，聯翩北向，而下無階級，導者謂從其內西向躋，暗夾中，有道可出，然愈上愈隘，不若仍出前洞也。出飯後，導者復肩炬爲水洞，龍洞遊，水洞在山西南隅，門亦南向，中寬數畝，潭水四際深不測，其外淺處，紫碧浮映，日光所爍也。洞左右俱有重崖，廻環潭上，可循行以入，各抵潭北，崖插巖，兩路有絕，上無岐穴，不識水洞何所止。出洞循西麓北，轉東得龍洞，洞在山西北。

西後洞西門亦北向中有水夾其上片石東西交成天生橋焉五丈以內又度一梁篝火入西穿石柱夾漸大南入可半里路窮下黑乃多燃火炬照耀之亦有深潭一泓縮水莫測其大更逾水洞投石沉沉亦止而不流也已而熄炬消燄南望隔潭深處杳杳光浮水面導者神以爲怪光使然予謂穴影旁透導人曰昔邨人結筏窮之至其處輒不得穴安所得倒影子曰此地深伏雖去洞頂甚遙然由門南出計去水洞不遠或水洞之光由水中深映浮筏者但從上矚不及悟光從水出耳若係靈怪豈有自古不一息者哉乃復明炬出洞別導入西南十里抵安祿營爲潯貴兩縣中道處蓋羅叢巖

遊記

三冊下
粵西二

三七

西北有崇山橫亘其東北自潯之西山直西南接貴縣北山二山兩角高張東西相距幾百四十里中間峰巒橫疊翠環雲繞頗似大容大容爲鬱江南條山界繡鬱兩江間此山爲鬱江北條山亦界黔鬱兩江間貴縣之倚北山猶鬱林之於大容西嶺潯州之倚西山猶容縣之於大容東峰皆東西窾聳兩角中則連亘焉第大容東西八十里較近中有北流縣界其間茲山較遠而別無縣治惟今安祿營爲中界耳

十二日自安祿西南二十六里直抵石山下爲平碣營營東石峰峭立曰大巖山巖甚巨中容數千人南又窾一小山上
有平架石若橫橋其下透明出小山西爲馬鞍山亦峭聳起

皆平碣近峰也。南望銳鋒若筆架若卓樵者在數里外。望之
趨三里度石梁。又南十二里直抵衆遙峰西麓。日劈竹鋪眺
路左諸峰分岐競異。卽貴縣東山也。又西南十八里抵貴縣
南門。則大江在其下。靜聞與顧僕所附舟已先泊南門久。下
船。迫暮放舟。乘月西行十五里而泊。

十三日行十里西抵西山南。東南轉十里爲宋邨。由貴縣南
至南山十里。南山至宋邨亦十里。舟行屈曲。水路倍之。予先
擬一至貴縣。卽往宿南山。來朝從南山間道候舟。詢之舟人
旣不得地名。且云舟將連夜發。遂不得行。及發。不過十餘里。
卽泊。今上午過宋邨。悔不從初所擬。至此登舟也。又四十五

遊記

三冊下
粵西二

三十八

里夾江兩山起。溯之入。又乘月十五里泊香江驛。

十四日過烏司堡。已十里爲橫州界。

十五日掛帆三十五里抵橫州南門。猶上午也。是日爲中秋
節。以行李及兩病人入南寧。舟子獨入城。徬江而東。二里抵
下渡。渡南岸爲寶華山。道道甚大。共十里過蒙氏山庄。又一
里東向入山。二里抵山下。披叢入之。寺尙在半山。渡澗拾級
又半里得寶華寺門。西向寺旁無他勝。問所謂山後瀑布僧
謂墜自後嶺。高百丈。峽爲叢木所蔽。行絕蹊。徑望之。無所睹。惟
從嶺而上。可聞其聲耳。予乃曳杖上嶺。自嶺至峽。皆紛植蔽。
虧。予直造山頂。風瀑怒聲不止。暴果不可見。嶺南下五十里。

卽靈山縣矣乃返寺宿

十六日自寶華下山十里望東北鳳凰諸石峰在三十里外
路遠不及往遂西抵州由上渡渡江入南寧舟

十七日舟西南行四十里抵陳步江內通小舟欽州鹽俱從
此出是日靜聞病轉劇

十八日舟至是多西北行旁皆土山繚繞蓋自入鬱江惟鳳
凰山石崖駢立瞰江餘皆土阜耳又三十五里泊江西岸

十九日平明行五里過火烟驛爲永淳縣界於是舟北轉歷
十二磯磯在江右涯盤石橫突江畔又四十里抵永淳南門
二十日北繞永淳東旋西繞其北江幾環城四隅矣於是始

遊記

三册下
粵西二

三十九

西北行其四十里過伶俐水五里泊

二十一日西南五十里八尺江自西來入江發源自欽州通
舟可抵上思州遂西泊黃花驛驛去南寧府尙五十里

以下八月二十二日至九月二十日凡遊南寧者皆缺

裔孫 熙海南校字